

MESYUARAT KETIGA, PENGGAL KEDUA
PARLIMEN KEEMPAT BELAS
2019

HARI ISNIN : 18 NOVEMBER 2019

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE DUA,
PARLIMEN EMPATBELAS**

PERTANYAAN : JAWAB LISAN

DARIPADA : YB TUAN CHAN MING KAI (ALOR SETAR)

TARIKH : 18 NOVEMBER 2019

SOALAN

TUAN CHAN MING KAI [ALOR SETAR] minta **MENTERI DALAM NEGERI** menyatakan apakah akta dan SOP yang membenarkan polis menyemak telefon bimbit orang awam pada bila-bila masa dan atas apa asas munasabah (*reasonable ground*) tentang anggapan jenayah berlaku yang menjustifikasikan semakan telefon tersebut dibuat.

JAWAPAN

Terima kasih Tuan Yang di-Pertua, terima kasih Yang Berhormat. Tuan Yang di-Pertua, pihak PDRM menggunakan peruntukan di bawah Seksyen 233, Akta Komunikasi dan Multimedia Tahun 1998, Akta 588 bagi memeriksa telefon bimbit seseorang semasa menjalankan siasatan dan semasa melaksanakan tugas menjaga ketenteraman awam.

Menerusi seksyen ini adalah menjadi satu kesalahan sekiranya seseorang menyalahgunakan kemudahan rangkaian atau perkhidmatan rangkaian telekomunikasi bagi tujuan seperti menghantar komunikasi yang lucah, sumbang, palsu, mengancam atau jelik sifatnya dengan niat untuk menyakitkan hati, menganiaya, mengugut atau mengganggu orang lain.

Melalui seksyen ini, mana-mana pegawai polis boleh mengambil tindakan dengan menyemak apa-apa kemudahan rangkaian atau perkhidmatan rangkaian termasuklah telefon bimbit milik orang yang disyaki melakukan kesalahan di bawah seksyen ini. Selain itu, manamana pegawai polis juga boleh mengambil tindakan bagi maksud pemeriksaan apa-apa kemudahan rangkaian atau perkhidmatan rangkaian termasuklah telefon bimbit mengikut peruntukan Seksyen 103, 104 dan 106, Kanun Tatacara Jenayah Akta 593 – di bawah 12 – Tindakan Pencegahan Oleh Polis. Terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN MOHD SHAHAR BIN ABDULLAH
[PAYA BESAR]**

TARIKH : 18 NOVEMBER 2019 (ISNIN)

SOALAN

Minta **MENTERI PENDIDIKAN** menyatakan

- (a) sejauh manakah Kementerian telah dan akan memberi kebebasan kepada Ahli Parlimen Pembangkang untuk memasuki kampus dan juga sekolah bagi mengadakan dan memenuhi undangan program; dan
- (b) rasional langkah Kerajaan menggabungkan universiti awam.

JAWAPAN

Tuan Yang di-Pertua,

- a) Kementerian Pendidikan Malaysia (KPM) tidak pernah menetapkan sebarang dasar yang menghalang Ahli Yang Berhormat atau wakil rakyat daripada menghadiri program-program yang dianjurkan oleh sekolah. Dalam hal ini, Kementerian telah mengeluarkan garis panduan kepada pentadbir sekolah melalui Surat Pekeliling Ikhtisas (SPI) Bil.3/2008: Mengundang Orang-orang Kenamaan ke Upacara Sekolah dan Penggunaan Premis Sekolah oleh Pihak Luar. Tujuan surat pekeliling ini adalah untuk memastikan program yang dijalankan di sekolah mencapai objektif yang ditetapkan, selain kemudahan yang terdapat di sekolah tidak disalah guna oleh pihak luar.

Untuk makluman Ahli Yang Berhormat, semua majlis di sekolah yang melibatkan orang-orang kenamaan atau individu tertentu hendaklah memohon kebenaran daripada Kementerian melalui Pengarah Pendidikan Negeri. Keutamaan hendaklah diberi kepada YB Menteri Pendidikan, YB Timbalan Menteri Pendidikan, Ketua Setiausaha Kementerian Pendidikan, Ketua Pengarah Pelajaran Malaysia, Pengarah Pendidikan Negeri atau wakil-wakil mereka untuk majlis perasmian sama ada di peringkat Jabatan Pendidikan Negeri, Pejabat Pendidikan Daerah atau pun di peringkat sekolah.

Di peringkat universiti awam, Kerajaan berpendirian bahawa semua Ahli Parlimen pembangkang yang berhasrat untuk masuk ke kampus bagi memenuhi undangan program/majlis yang dibuat oleh mahasiswa di dalam kampus universiti awam boleh berbuat demikian sekiranya program berkenaan telah mendapat kelulusan pihak Timbalan Naib Canselor. Hal ini adalah selari dengan autonomi yang telah diberikan kepada pihak universiti untuk membuat keputusan berdasarkan pertimbangan yang sewajarnya.

Ruang dan nikmat kebebasan yang diberikan Kerajaan sewajarnya dimanfaatkan dengan penuh tanggungjawab dengan tidak mengganggu gugat keharmonian Institusi Pendidikan Tinggi (IPT) sebagai 'rumah' menimba ilmu pengetahuan dan kemahiran insaniah.

(b) Rasional Penggabungan Universiti Awam

Pihak kerajaan sentiasa terbuka untuk mempertimbangkan sebarang cadangan dan inisiatif yang dilihat berupaya meningkatkan kualiti dan prestasi mana-mana universiti awam. Penggabungan dua universiti awam yang terpilih adalah satu contoh inisiatif yang sedang diperhalusi agar sebarang keputusan muktamad kelak bakal membawa natijah positif kepada semua pihak.

Buat masa ini, hanya ada satu cadangan penggabungan universiti awam yang sedang berlangsung. Mesyuarat Jemaah Menteri pada dasarnya telah bersetuju dengan cadangan supaya Universiti Sultan Zainal Abidin (UniSZA) dan Universiti Malaysia Terengganu (UMT) digabungkan. Kerajaan akan memastikan penggabungan ini tidak akan

NO. SOALAN : 2

merugikan mana-mana pihak yang terlibat kerana ia dapat melonjakkan prestasi dan pencapaian universiti ke tahap yang lebih cemerlang di peringkat negara dan antarabangsa. Penggabungan yang dirancang ini bakal memperkasakan hub pendidikan tinggi di negeri Terengganu serta memperkukuhkan kebitaraan bidang fokus sedia ada dan mengembangkan kebitaraan bidang fokus baharu dapat diwujudkan melalui aktiviti *transdisciplinary*.

Sehubungan dengan itu, Kementerian telah menubuhkan satu Jawatankuasa Pemandu yang diketuai oleh Ketua Pengarah Pendidikan Tinggi (KPPT) untuk memastikan proses penggabungan ini dapat dilaksanakan dengan efisien dan efektif.

Melalui perbincangan awal pada 26 dan 27 September 2019, UMT dan UniSZA telah bersetuju untuk menggunakan peluang penggabungan ini bagi memperkasakan lagi kebitaraan bidang fokus kedua-dua buah universiti, mempertingkatkan kualiti perkhidmatan serta memberi lebih nilai tambah kepada mahasiswa, fakulti serta komuniti setempat.

Beberapa sesi libat urus telah diadakan bersama-sama pihak berkepentingan universiti iaitu Pengerusi LPU, pengurusan tertinggi, wakil-wakil staf akademik, staf pentadbiran dan sokongan, mahasiswa dan alumni. Kementerian juga telah mendapatkan maklumbalas daripada wakil-wakil agensi persekutuan seperti Jabatan Perkhidmatan Awam (JPA), Kementerian Kewangan (MOF), Jabatan Peguam Negara (AGC) dan Kementerian Hal Ehwal Ekonomi (MEA). Sesi libat urus bersama Gabungan Majlis Presiden Dan Setiausaha Kehormat Kesatuan Kakitangan Universiti/IPTA Malaysia (GAKUM) juga telah dilaksanakan. Proses libat urus seumpama ini akan diteruskan oleh pihak Kementerian dan sebarang isu yang timbul akan ditangani sebaiknya.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : TUAN WILLIAM LEONG JEE KEEN
[SELAYANG]**

TARIKH : 18 NOVEMBER 2019 (ISNIN)

SOALAN

Minta **MENTERI PERTANIAN DAN INDUSTRI ASAS TANI** menyatakan langkah-langkah yang diambil untuk menangani penyalahgunaan Permit Kelulusan (AP) mengimport kubis yang menimbulkan isu persaingan menyebabkan harga sayur meningkat dan kelemahan persaingan 5 jenis makanan yang dinyatakan dalam Kajian Pasaran Sektor Makanan 2019.

JAWAPAN

Tuan Yang Dipertua,

1. Kubis bulat merupakan antara 5 jenis keluaran pertanian yang dikenakan kawalan import di mana kelulusan kuota import AP diluluskan berdasarkan Perintah Duti Kastam 2017. MOA telah dan sentiasa melaksanakan langkah secara berterusan untuk meningkatkan ketelusan dan tadbir urus yang baik (*transparency and good governance*) dalam pentadbiran AP. Antara inisiatif yang telah diambil seperti berikut:

- (i) langkah pemutihan yang mengenalpasti syarikat-syarikat yang tidak diperbaharui AP mereka berikutan tidak mencapai prestasi yang ditetapkan;
- (ii) penambahbaikan *Standard Operating Procedure* (SOP) sedia ada; dan

SOALAN NO : 3

- (iii) pelaksanaan *Government Integrity and Anti-Corruption Commission* (GIACC) untuk mengekang pihak ketiga dalam rantai pembekalan kubis;
2. MOA telah mengenal pasti perubahan harga sayur berlaku pada masa-masa tertentu sahaja akibat faktor di luar kawalan iaitu:
- (i) perubahan musim penanaman negara pengeluar di antara bulan Mei hingga Julai;
 - (ii) kadar tukaran mata wang USD-MYR yang mengalami peningkatan ketara dalam tempoh tersebut memberi impak kepada kos perdagangan import eksport; dan
 - (iii) peningkatan dalam kadar permintaan pada musim-musim perayaan.
3. Bagi isu bekalan daging, MOA telah melaksanakan langkah berikut:
- (i) membuka ruang untuk pengimportan daging dari beberapa negara lain termasuk Amerika Syarikat, Pakistan, Brazil dan New Zealand;
 - (ii) menyediakan maklumat berkaitan 56 *abattoir* di seluruh dunia yang boleh membekalkan daging ke Malaysia;
 - (iii) memaklumkan bahawa semua syarikat yang layak boleh memohon untuk mengimport daging dari mana-mana negara sumber, tertakluk kepada syarat sanitari dan phytosanitari (SPS) dan garis panduan antarabangsa seperti *World Organisation for Animal Health* (OIE), keselamatan makanan juga berpandukan kepada Garis Panduan Codex dan Malaysia Standard MS 1480:2007, MS 1514:2009 serta MS 1500:2009 (Halal) yang dipersetujui oleh kedua-dua negara; dan

SOALAN NO : 3

- (iv) sedang dalam proses untuk meminda Akta Perkhidmatan Kuarantin dan Pemeriksaan Malaysia 2011 (Akta 728) bertujuan untuk memperluaskan fungsi dan bidangkuasa kuasa MAQIS. Perluasan kuasa ini tidak akan menghadkan kuasa MAQIS kepada pintu masuk sahaja tetapi juga diluar pintu masuk, pusat dan stesyen kuarantin.

4. Bagi sayur sawi dan ikan kembung, kajian dilihat lebih tertumpu kepada isu ketidakstabilan harga pasaran yang disebabkan oleh orang tengah. Orang tengah telah mengaut keuntungan yang melampau serta mempunyai banyak lapisan di pelbagai peringkat. Antara langkah yang telah diambil bagi mengurangkan lapisan Orang Tengah adalah seperti pelaksanaan program Ikan Segar Beku Qfish dan galakan kepada ternakan ikan akuakultur untuk memberi alternatif kepada pasaran seterusnya pengguna boleh membeli pada harga yang lebih berpatutan.

5. MOA sedang menyediakan satu kajian susulan untuk mengenal pasti langkah-langkah terbaik yang boleh diambil oleh Kerajaan bagi menangani isu kecekapan keseluruhan rangkaian pemasaran makanan termasuk kajian ke atas rangkaian pemasaran input pertanian.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

DARIPADA : YB TUAN AWANG B. HASHIM (PENDANG)

TARIKH : 18 NOVEMBER 2019

SOALAN

TUAN HAJI AWANG BIN HASHIM [PENDANG] minta **MENTERI
DALAM NEGERI** menyatakan:-

- a. Apakah syarat-syarat permohonan rakyat asing yang mahu menjadi warganegara Malaysia; dan
- b. Apakah benar dakwaan bahawa Kerajaan telah memudahkan untuk memberi taraf warganegara kepada pelancong-pelancong yang datang dari tanah besar China dan Hong Kong.

JAWAPAN

Terima kasih Tuan Yang di-Pertua dan terima kasih Yang Berhormat Pendang.

Tuan Yang di-Pertua, oleh kerana soalan ini ada dua soalan di situ so, izinkan saya untuk menjawab soalan ini agak panjang sedikit. Bahagian III Perlembagaan Persekutuan telah memperuntukkan dua kaedah pemerolehan kewarganegaraan bagi individu warga asing iaitu melalui pendaftaran atau penaturalisasian jika telah memenuhi syarat-syarat yang ditetapkan oleh Perlembagaan Persekutuan (Citizenship Rules 1964) dan lain-lain perundangan berkaitan.

Kaedah pemerolehan kewarganegaraan oleh warga asing adalah seperti mana berikut. Pertama, kewarganegaraan melalui pendaftaran. Di bawah Perkara 15(1) Perlembagaan Persekutuan bagi isteri kepada warganegara Malaysia dengan syarat-syarat berikut:-

- i) perkahwinan yang didaftarkan mengikut perundangan bertulis di Malaysia;
- ii) suami kepada wanita warga asing berkenaan bertaraf warganegara Malaysia;
- iii) perkahwinan masih wujud dan berterusan;
- iv) pemohon telah memenuhi tempoh permastautinan melebihi dua tahun yang dikira daripada pegangan MyPR sebelum tarikh permohonan dibuat; dan,
- v) berkelakuan baik yang dinilai melalui tapisan keselamatan oleh Polis Diraja Malaysia.

SOALAN NO : 4

Di bawah Perkara 15(2) Perlembagaan Persekutuan pula bagi individu berumur bawah 21 tahun dengan syarat-syarat berikut:-

- i) sekurang-kurangnya salah seorang ibu atau bapanya adalah warganegara Malaysia;
- ii) terdapat bukti keberadaan subjek di Persekutuan; dan,
- iii) penjaga yang ingin memohon, perlu mengemukakan surat hak penjagaan daripada mahkamah.

Di bawah Perkara 15A Perlembagaan Persekutuan bagi individu berumur bawah 21 tahun dengan syarat-syarat berikut:-

i) permohonan daripada ibu bapa:-

- a) bapanya adalah warganegara Malaysia; dan,
- b) terdapat bukti penjagaan dan keberadaan subjek di Persekutuan.

ii) bagi permohonan daripada penjaga ataupun penganjur:-

- a) penjaga subjek dari Jabatan Kebajikan Masyarakat.

iii) permohonan untuk anak angkat:-

- a) pengangkatan yang sah;
- b) ibu atau bapa angkat adalah warganegara Malaysia;
- c) perkahwinan ibu, bapa angkat teratur; dan,
- d) terdapat bukti penjagaan dan keberadaan subjek di Persekutuan.

SOALAN NO : 4

Di bawah Perkara 16 Perlembagaan Persekutuan pula, bagi individu berumur 18 tahun dan ke atas yang dilahirkan di Persekutuan sebelum hari merdeka dengan syarat-syarat berikut:-

- i) memiliki sijil kelahiran sebagai bukti dilahirkan di Persekutuan;
- ii) pemohon telah memenuhi tempoh permastautinan melebihi tujuh tahun yang dikira daripada pegangan MyPR sebelum tarikh permohonan dibuat;
- iii) berkelakuan baik yang dinilai melalui tapisan keselamatan oleh PDRM; dan,
- iv) mempunyai pengetahuan asas dalam Bahasa Melayu.

Kedua, kewarganegaraan melalui peneutralisasian di bawah Perkara 19 Perlembagaan pula dengan syarat-syarat berikut:-

- i) pemohon telah memenuhi tempoh permastautinan melebihi 12 tahun yang dikira daripada pegangan MyPR sebelum tarikh permohonan dibuat;
- ii) berkelakuan baik yang dinilai melalui tapisan keselamatan oleh PDRM; dan,
- iii) mempunyai pengetahuan Bahasa Malaysia yang memadai.

Berhubung dengan dakwaan bahawa kerajaan telah memudahkan untuk memberi taraf kewarganegaraan kepada pelancong-pelancong dari China dan Hong Kong seperti yang dibangkitkan oleh Ahli Yang Berhormat, dakwaan berkenaan adalah tidak benar. Adalah ditegaskan bahawa penganugerahan kewarganegaraan Malaysia merupakan anugerah tertinggi dan hak eksklusif Kerajaan Persekutuan yang tidak diberikan sewenang-wenangnya.

SOALAN NO : 4

Pertimbangan terhadap permohonan kewarganegaraan adalah selaras dengan peruntukan di bawah Bahagian III Perlembagaan Persekutuan, Citizenship Rules 1964, dengan izin serta perundangan berkaitan yang berkuat kuasa dalam isu pendaftaran perkahwinan, kesahtarafan anak, peraturan imigresen dan lain-lain.

Selain daripada itu, KDN mengambil maklum satu dakwaan terdapat 200 ribu penerima “Sijil Kewarganegaraan Baru Ikrar Sedia Balas Budi Kerajaan PH” yang tular di media sosial Facebook dan Twitter oleh individu bernama Tengku Raja Alam Shah. Sehubungan dengan itu, satu kenyataan rasmi telah dikeluarkan oleh Kementerian Dalam Negeri bagi menafikan dakwaan tersebut dan meminta pihak yang bertanggungjawab tampil membuktikan dakwaan tersebut adalah sah dan bukan bersifat tohmahan semata-mata.

KDN melalui Jabatan Pendaftaran Negara memandang serius mengenai perkara ini dan satu laporan polis telah dibuat oleh Ketua Pengarah Jabatan Pendaftaran Negara sendiri pada 29 September 2019 di Ibu Pejabat Polis Daerah Putrajaya agar siasatan dapat dilakukan terhadap pemilik akaun media sosial tersebut. Sekian, terima kasih.

**PEMBERITAHUAN PERTANYAAN DEWAN RAKYAT,
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN WONG HON WAI (BUKIT BENDERA)

TARIKH : 18 NOVEMBER 2019 (ISNIN)

SOALAN

Minta **MENTERI PERTAHANAN** menyatakan apakah pencapaian misi bantuan Angkatan Tentera Malaysia ke Cox's Bazar, Bangladesh dan apakah langkah berjaga-jaga untuk mengelakkan pelarian Rohingya daripada membanjiri sempadan darat dan maritim Malaysia.

JAWAPAN

Tuan Yang di-Pertua,

Objektif utama Hospital Medan Malaysia di Cox's Bazaar adalah bagi menunjukkan kepimpinan Malaysia dalam menerajui isu kemanusiaan di rantau ini. Malaysia merupakan satu-satunya negara ASEAN yang membuka hospital medan untuk krisis Rohingya ini. Malaysia juga telah dibantu oleh negara-negara luar seperti Brunei Darussalam, Arab Saudi dan Emiriyah Arab Bersatu untuk memberi bantuan kepada pelarian Rohingya di sana. Hospital ini juga mendapat pujian dan pengiktirafan daripada pelbagai agensi luar negara seperti World Health Organisation (WHO), Refugee Relief and Repatriation Commission (RRRC) dan International Committee of the Red Cross (ICRC) dan menjadi hospital rujukan di daerah berkenaan. Sehingga kini sebanyak 81,698 kes telah dirawat di hospital medan ini.

Kehadiran hospital medan juga telah meningkatkan hubungan baik dengan negara Bangladesh dan menjadikan operasi ini sebagai medan latihan untuk meningkatkan kesiagaan ATM dalam menghadapi situasi bantuan kemanusiaan dan kesihatan. Hospital Medan Malaysia bukan

sahaja memberikan bantuan perubatan dan kesihatan kepada pelarian Rohingya tetapi turut memberi khidmatnya kepada penduduk setempat.

Jemaah Menteri telah bersetuju pada 2 Oktober 2019 untuk melanjutkan operasi hospital berkenaan sehingga selewat-lewatnya pada Disember 2021, iaitu lanjutan maksimum dua (2) tahun. Pengoperasian hospital ini akan melibatkan kerjasama dari Kementerian Kesihatan Malaysia (KKM) dan NGO's yang berkaitan.

Bagi langkah berjaga-jaga untuk mengelakkan kebanjiran pelarian Rohingya ke kawasan perairan Malaysia iaitu di Selat Melaka Utara, Tentera Laut Diraja Malaysia (TLDM) melalui Markas Wilayah Laut 3 yang berpangkalan di Langkawi telah dipertanggungjawabkan untuk melaksanakan operasi bagi memantau kemasukan pelarian Rohingya ke perairan negara. Di samping itu, kerjasama perisikan dengan Tentera Laut Thailand juga diwujudkan bagi tujuan perkongsian maklumat. Pada masa ini, TLDM terlibat dengan Operasi Bantuan Kemanusiaan yang diterajui oleh Agensi Penguatkuasa Maritim Malaysia (APMM). Fungsi TLDM dalam operasi ialah sebagai elemen bantuan yang membantu pihak APMM dalam pelaksanaan operasi.

Bagi kawalan sempadan daratan pula khususnya di sempadan Malaysia/Thailand, Tentera Darat (TD) melaksanakan operasinya dalam usaha menangani isu penyeludupan dan jenayah rentas sempadan serta ancaman kemasukan pelarian Rohingya ke sempadan Malaysia. Kerjasama dengan pihak Tentera Darat Thailand juga dilaksanakan melalui operasi bersama yang dijalankan di sempadan Malaysia/Thailand.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KE EMPAT BELAS**

PERTANYAAN : LISAN

DARIPADA : TUAN AHMAD TARMIZI BIN SULAIMAN [SIK]

TARIKH : 18 NOVEMBER 2019 (ISNIN)

SOALAN

Minta **MENTERI PERTANIAN DAN INDUSTRI ASAS TANI** menyatakan kedudukan Akta Perlindungan Varieti Baru Tumbuhan 2004 yang bertindak mengimbangi hak-hak petani dan hak pembiakan baka tumbuhan komersial dengan terma-terma yang ada di dalam Konvensyen UPOV 91 sama ada untuk diselaraskan ataupun tidak.

JAWAPAN

Yang di-Pertua,

1. Kementerian bercadang untuk meminda Akta Perlindungan Varieti Baru Tumbuhan 2004 bagi tujuan berikut :

- i. mengelak pertindihan kuasa kepada Akta-akta sedia ada seperti:-
 - Akta Akses Kepada Sumber Biologi Dan Perkongsian Faedah 2017 (Akta 795)
 - Akta Biokeselamatan 2007 (Akta 678)
- ii. mempercepatkan proses pemberian hak pembiak baka;
- iii. mengiktiraf hasil usaha pembiak baka yang membangunkan varieti baru;
- iv. melindungi varieti baru yang telah didaftarkan; dan

SOALAN NO : 6

- v. menambah baik hak-hak petani selaras dengan Konvensyen International Union For The Protection of New Varieties of Plants (UPOV) 1991.

2. Skop Rang Undang-Undang (Pindaan) Akta Perlindungan Varieti Baru Tumbuhan ini hanya melibatkan varieti baru tanaman yang didaftarkan dan tidak menyentuh varieti-verieti sedia ada dalam negara. Pindaan RUU ini akan memberikan hak yang sama kepada semua pembiak baka sama ada petani, profesional, usahawan atau syarikat dalam mendaftarkan varieti baru yang dihasilkan. Sistem Perlindungan di bawah RUU ini membolehkan pembiak baka mendaftar dan mendapat hak perlindungan pada varieti yang memenuhi syarat Kebaharuan, Kelainan, Keseragaman dan Kestabilan (*Novelty, Distinctness, Uniformity and Stability*).

3. RUU ini membenarkan petani kecil untuk menghasilkan, menyimpan dan bertukar bahan tanaman sesama petani dari varieti yang dilindungi tanpa tujuan komersil mengikut definisi dan syarat yang telah ditetapkan di bawah RUU ini.

4. Justeru, petani akan mempunyai banyak pilihan dalam memilih benih-benih dari pelbagai varieti baru atau varieti sedia ada yang dikeluarkan oleh mana-mana pihak sama ada individu atau syarikat kecil mahupun syarikat gergasi. Petani pastinya akan cenderung untuk memilih varieti yang mampu memberikan pulangan yang tinggi pada harga yang setimpal kerana penerimaan sesuatu varieti bukan bergantung kepada syarikat yang menghasilkannya tetapi kualiti dan potensi yang mampu diberikan oleh varieti tersebut.

5. Kementerian yakin pindaan Akta ini kelak akan dapat melindungi hak petani dan membawa industri benih tanaman ke peringkat yang lebih tinggi melalui penghasilan pelbagai varieti-varieti baru tanaman yang dapat memberi pelbagai pilihan dan membantu petani meningkatkan produktiviti melalui penggunaan benih-benih yang mempunyai ciri-ciri *superior* yang dihasilkan. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : YB TUAN TEH KOK LIM (TAIPING)

TARIKH : 18 NOVEMBER 2019

SOALAN NO. 7

YB TUAN TEH KOK LIM [TAIPING] minta **MENTERI PERDAGANGAN ANTARABANGSA DAN INDUSTRI** menyatakan usaha-usaha yang telah diambil demi meningkatkan lagi perdagangan antarabangsa khususnya dalam usaha menarik pelaburan asing ke Malaysia.

JAWAPAN

Tuan Yang Dipertua,

1. Kedudukan Malaysia yang strategik serta persekitaran perniagaan yang kondusif membolehkan Malaysia terus dilihat sebagai sebuah negara yang kompetitif dan berdaya saing dan sentiasa menjadi destinasi pelaburan utama bagi pelabur- pelabur asing di rantau ini.
2. Manakala bagi tempoh Januari hingga Jun 2019, Malaysia merekodkan jumlah pelaburan yang diluluskan sebanyak RM92.0 billion. Dari jumlah ini, pelaburan asing menunjukkan peningkatan memberangsangkan iaitu sebanyak 97.2% iaitu RM49.5 billion berbanding RM25.1 billion yang dicatat pada pertengahan tahun pertama tahun 2018.
3. Dalam tempoh yang sama, jumlah pelaburan yang diluluskan dalam sektor perkilangan adalah sebanyak RM33.15 bilion. Daripada jumlah tersebut, sebanyak 75.8% atau RM25.1 billion pelaburan adalah daripada sumber pelaburan asing. Negara Amerika Syarikat dan China merupakan

penyumbang pelaburan terbesar di dalam sektor perkilangan, masing-masing berjumlah RM11.7 billion (35.3%) dan RM4.8 billion (14.5%) yang direkodkan dalam tempoh ini. Ini menunjukkan bahawa pelaburan asing memainkan peranan penting dalam memacu perkembangan ekonomi negara pada masa ini.

4. Pelabur asing, khususnya yang telah bertapak di Malaysia dilihat terus melabur, berkembang dan mempelbagaikan projek mereka khususnya dalam projek berteknologi tinggi dan berintensifkan modal. Pihak Kementerian percaya dengan aktiviti promosi yang berterusan, misi pelaburan yang bersasar dan usaha-usaha menambahbaik fasilitasi yang mesra perniagaan akan dapat terus meningkatkan keyakinan pelabur dan menarik lebih banyak pelaburan berkualiti pada tahun ini.

Tuan Yang Dipertua,

5. Antara langkah yang diambil oleh Kementerian untuk meraih pelaburan luar sekaligus mengukuhkan kedudukan negara sebagai destinasi pilihan pelaburan adalah:

i. Melaksanakan “pendekatan berfokus” dan “pendekatan ekosistem” dalam usaha menarik pelaburan berkualiti, dengan memberi penekanan terhadap industri yang bernilai tambah tinggi; industri berteknologi tinggi dan berintensifkan modal; industri berintensifkan pengetahuan; serta aktiviti-aktiviti penyelidikan dan pembangunan (R&D). Dalam konteks ini, pelbagai usaha galakan pelaburan berbentuk fiskal dan bukan fiskal bagi mempromosikan industri-industri tersebut telah diperkenalkan dan ditambahbaik secara berterusan.

ii. Mengkaji dan membuat penambahbaikan secara berterusan terhadap pelaksanaan dasar dan polisi sedia ada supaya mesra pelaburan. Ini adalah bagi memastikan Malaysia sentiasa menjadi destinasi pelaburan yang kondusif dan kompetitif untuk para pelabur asing dengan menyasarkan projek-projek yang berkualiti dan berimpak tinggi. Ini juga sekaligus dapat melengkapkan ekosistem

sektor perkilangan dan perkhidmatan yang disasarkan melalui pemberian insentif serta memudahcara proses dan prosedur.

iii. Memperluaskan pembangunan rantai bekalan dengan melengkapkan hubungan rantai industri sama ada industri hulu sedia ada dan industri hiliran yang baru. Ini dilakukan dengan menyediakan platform untuk padanan perniagaan (*business matching*) di mana projek usahasama atau *joint-venture projects* dapat dilakukan bagi melaksanakan pengilangan kontrak. Antara langkah Kerajaan untuk mencapai hasrat tersebut adalah dengan menganjurkan beberapa sesi persidangan pembekal-pembekal industri atau *suppliers' conferences* dan juga menganjurkan program-program pembangunan vendor.

iv. Penganjuran program-program seperti Misi Perdagangan dan Pelaburan, '*Specific Project Mission*' dan '*Supplier Conference Seminar*' oleh Kementerian dan agensi-agensi di bawah Kementerian ini ke negara-negara pengeksport utama modal dan teknologi. Kementerian akan bekerjasama dengan agensi untuk berkongsi maklumat terkini tentang peluang pelaburan dan kedudukan ekonomi negara yang kukuh ketika mempromosikan peluang-peluang pelaburan di Malaysia melalui penganjuran seminar, mesyuarat meja bulat dan program-program berkaitan pelaburan yang berpotensi di dalam sektor perkilangan dan perkhidmatan di negara ini.

6. Strategi-strategi tersebut adalah antara usaha-usaha yang diambil untuk menarik pelaburan asing ke Malaysia. Kerajaan akan sentiasa komited dengan usaha berterusan bagi menarik pelaburan asing ke Malaysia.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE DUA,
PARLIMEN EMPATBELAS**

PERTANYAAN : JAWAB LISAN

**DARIPADA : YB DATO' DR. NORAINI B. AHMAD
(PARIT SULONG)**

TARIKH : 18 NOVEMBER 2019

SOALAN

DATO' DR. NORAINI AHMAD [PARIT SULONG] minta **MENTERI DALAM NEGERI** menyatakan statistik kemasukan pelancong asing ke dalam negara semasa berlakunya kegagalan teknikal dan gangguan sistem operasi di Lapangan Terbang Antarabangsa Kuala Lumpur (KLIA) baru-baru ini.

JAWAPAN

Terima kasih Tuan Yang di-Pertua, terima kasih Yang Berhormat Parit Sulong.

Tuan Yang di-Pertua, untuk makluman Ahli Yang Berhormat, pihak kementerian dan Jabatan Imigresen Malaysia tidak berkompromi daripada aspek keselamatan dalam memastikan kawalan di pintu masuk sentiasa dipantau sepanjang berlakunya gangguan teknikal pada sistem di Lapangan Terbang Antarabangsa Kuala Lumpur, KLIA1 dan KLIA2 pada bulan Ogos yang lalu.

Pihak JIM sentiasa melaksanakan prosedur mengikut tatacara standard operasi ataupun SOP seperti yang telah ditetapkan dan pegawai kaunter yang juga menurunkan endorsement keluar dan masuk setelah memastikan segala prosedur pemeriksaan serta syarat kemasukan pelawat dipenuhi selaras dengan prosedur yang telah ditetapkan daripada semasa

SOALAN NO : 8

ke semasa dalam menguatkuasakan Akta Imigresen 1959/63, Peraturan-peraturan Imigresen 1963, Akta Pasport 1966, dan Akta Antipemerdagangan Orang dan Antipenyeludupan Migran 2007. Selain itu, pas khas untuk rujukan ke negeri yang ingin dilawati juga dikeluarkan kepada pelawat asing bagi tujuan semakan dan pemeriksaan yang lebih terperinci oleh Jabatan Imigresen Malaysia di negeri tersebut.

Sebagai langkah-langkah tambahan, rujukan Senarai Syak turut diedarkan kepada pegawai kaunter bagi semakan pelawat asing yang tersenarai dalam Senarai Syak jabatan sebelum penurunan cap keselamatan dibuat.

Berdasarkan statistik ketibaan dan pelepasan yang direkodkan oleh Malaysia Airports Holdings Berhad (MAHB) sejumlah 368,042 orang pelawat asing telah tiba ke Malaysia melalui KLIA1 dan KLIA2 dari 21 sehingga 25 Ogos 2019. Manakala seramai 347, 981 orang pelawat asing telah berlepas keluar dari Malaysia melalui KLIA1 dan KLIA2 bagi tempoh yang sama. Pihak JIM turut merekodkan sejumlah 365 orang pelawat asing telah dikenakan arahan Notis Penolakan Masuk bagi tempoh yang sama iaitu 21 hingga 25 Ogos 2019.

Tuan Yang di-Pertua, apa yang kami ingin tegaskan di sini bahawa walaupun sistem itu tidak beroperasi ataupun down, pun begitu Jabatan Imigresen masih mampu untuk mengutip rekod-rekod ini dan juga mengelakkan daripada orang yang tidak sewajarnya kita benarkan masuk, kita telah tahan dulu dan hantar mereka keluar. Pihak JIM di KLIA telah mengambil segala langkah kawalan sepanjang insiden kegagalan sistem Total Airport Management System (TAMS) dan sentiasa memastikan kawalan pintu masuk negara tidak dibolosi dengan mudah demi keselamatan negara. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN WONG TACK [BENTONG]

TARIKH : 18 NOVEMBER 2019 (ISNIN)

SOALAN NO. 9

Minta **MENTERI TENAGA, SAINS, TEKNOLOGI, ALAM SEKITAR DAN PERUBAHAN IKLIM** menyatakan adakah tapak pelupusan sisa radioaktif (PDF) Asian Rare Earth di Banjaran Kledang telah retak. Jika ya, nyatakan tahap pencemaran, tindakan yang telah diambil, kos terlibat dan apakah jaminan Kerajaan bahawa ia tidak akan retak lagi.

JAWAPAN

Tuan Yang di-Pertua,

Untuk makluman Ahli Yang Berhormat,

Pensampelan radiologi dan alam sekitar dilakukan 4 kali setahun meliputi parameter aras sinaran luar, air, radon and thoron di kemudahan pelupusan sisa radioaktif Asian Rare Earth di Bukit Kledang. Pensampelan terkini telah diambil pada 18 September 2019 dan sampel tersebut sedang dianalisa oleh Agensi Nuklear Malaysia. Bacaan awal aras sinaran luar yang diambil telah merakamkan bacaan di sekitar tapak pelupusan sisa radioaktif di bawah had orang awam di bawah Akta Perlesenan Tenaga Atom 1984 (Akta 304) iaitu 0.50 $\mu\text{Sv/jam}$.

Keputusan analisa radon dan thoron yang terkini oleh Agensi Nuklear Malaysia, berdasarkan bacaan yang diambil pada bulan Julai 2019 juga di bawah had orang awam selaras dengan Akta 304. Bacaan radon

NO. SOALAN: 9

adalah 36.1 Bq/m^3 di bawah had 200 Bq/m^3 manakala bacaan thoron adalah 55.6 Bq/m^3 di bawah had 500 Bq/m^3 .

Bacaan yang dirakamkan dalam pensampelan sebelum dan pemeriksaan berkala sebelum ini juga tidak menimbulkan rakaman bacaan yang ganjil.

Projek ini tertakluk kepada perundangan yang ketat dari pelbagai agensi. Kerajaan melalui Lembaga Perlesenan Tenaga Atom (LPTA) sentiasa memantau kemudahan tersebut melalui pemeriksaan berkala yang dijalankan dan pemilik telah dilesenkan di bawah Akta Perlesenan Tenaga Atom 1984 (Akta 304).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI DR. SHAHIDAN BIN KASSIM
[ARAU]**

TARIKH : 18 NOVEMBER 2019 (ISNIN)

SOALAN

Minta **MENTERI PENDIDIKAN** menyatakan secara terperinci berkenaan ketetapan dasar baharu pemberian biasiswa atau pinjaman pelajar keluar negara memandangkan keadaan kewangan negara kini semakin merosot:

- (a) adakah pihak Kerajaan bercadang untuk memberi biasiswa atau pinjaman hanya untuk pelajar yang mengambil ijazah kedoktoran (PhD) sahaja ; dan
- (b) berapa jumlah biasiswa yang telah dikeluarkan mengikut kaum dan jantina bagi tahun 2018 ke tahun 2019.

JAWAPAN

Tuan Yang di-Pertua,

(a) Pada masa ini pelaksanaan program tajaan biasiswa oleh Kementerian Pendidikan Malaysia (KPM) adalah difokuskan kepada pegawai dalam perkhidmatan khususnya dalam melatih guru-guru, pensyarah Kolej Komuniti dan Politeknik serta pensyarah universiti awam (UA) dalam memenuhi keperluan perkhidmatan.

Walau bagaimanapun, KPM turut menawarkan tajaan biasiswa kepada orang awam dari peringkat Ijazah Pertama hingga Ijazah Kedoktoran

melalui pelaksanaan program MyBrainSc. Namun tawaran Biasiswa ini hanyalah disasarkan kepada program khusus sains tulen.

Berdasarkan maklumat yang diperoleh daripada Jabatan Perkhidmatan Awam (JPA), sehingga kini penajaan JPA masih lagi diteruskan dalam bentuk Pinjaman Boleh Ubah (PBU) bagi menyediakan penajaan kepada pelajar untuk melanjutkan pelajaran ke peringkat tertieri di dalam dan di luar negara. Walau bagaimanapun, penajaan ke luar negara adalah berdasarkan bidang tajaan yang telah ditetapkan Kerajaan selaras dengan bidang keperluan Negara yang telah dikenal pasti.

Bagi mengiktiraf kecemerlangan pelajar di peringkat Ijazah Sarjana Pertama / Sarjana, JPA turut menyediakan peluang penajaan khusus kepada pelajar tajaan JPA untuk melanjutkan pengajian ke peringkat yang lebih tinggi tertakluk kepada syarat-syarat yang telah ditetapkan.

(b) Berhubung statistik pembiayaan biasiswa, bagi tahun 2018 KPM telah menawarkan sebanyak 985 biasiswa di peringkat kedoktoran melibatkan 370 orang penerima biasiswa lelaki dan 615 orang penerima biasiswa perempuan. Manakala bagi tahun 2019 sebanyak 761 biasiswa ditawarkan di peringkat kedoktoran melibatkan 315 orang penerima biasiswa lelaki dan 446 orang penerima biasiswa perempuan.

Merujuk kepada penajaan Pinjaman Boleh Ubah (PBU) oleh JPA pula, bagi tahun 2018 jumlah penerima biasiswa yang ditawarkan adalah seramai 11,633 orang melibatkan 4,416 orang penerima biasiswa lelaki dan 7,217 orang penerima biasiswa perempuan. Manakala bagi tahun 2019, jumlah penerima biasiswa yang ditawarkan oleh JPA adalah seramai 11,098 orang melibatkan 3,890 orang penerima biasiswa lelaki dan 7,208 orang penerima biasiswa perempuan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE DUA,
PARLIMEN EMPATBELAS**

PERTANYAAN : JAWAB LISAN

DARIPADA : YB TUAN LIM LIP ENG (KEPONG)

TARIKH : 18 NOVEMBER 2019

SOALAN

TUAN LIM LIP ENG [KEPONG] minta **MENTERI DALAM NEGERI** menyatakan status penyiasatan report polis bahawa pensijilan halal Malaysia tidak tertakluk di bawah bidang kuasa JAKIM dan Kerajaan Malaysia kini dipimpin oleh parti DAP. Apakah tindakan polis terhadap pihak-pihak yang mengeluarkan kenyataan membangkitkan sensitiviti perkauman, bangsa dan agama.

JAWAPAN

Terima kasih Tuan Yang di-Pertua. Terima kasih Yang Berhormat Kepong. Kementerian Dalam Negeri dimaklumkan bahawa satu laporan polis yang dibuat oleh Ahli Parlimen Kepong berhubung laporan berita di akhbar The Star mengenai petikan kenyataan Naib Presiden UMNO, Dato' Sri Ismail Sabri Yaakob yang juga Yang Berhormat Bera yang mendakwa persijilan logo halal kini di bawah Kementerian Kewangan yang dipimpin oleh Parti DAP.

Laporan polis tersebut diterima di IPD Dang Wangi pada 17 September 2019 dan perkara tersebut disiasat di bawah seksyen 505(c) Kanun Keseksaan mengenai kenyataan-kenyataan yang mendatangkan khianat awam dengan niat hendak mengapikan atau yang mungkin mengapikan mana-mana golongan atau kaum, melakukan sesuatu kesalahan terhadap manamana golongan atau kaum lain.

Kertas siasatan telah dirujuk ke pejabat Timbalan Pendakwa Raya pada 23 Oktober 2019 untuk arahan dan pertimbangan selanjutnya. Untuk makluman Yang Berhormat, Kementerian Dalam Negeri melalui penguatkuasaan polis tidak akan teragak-agak mengambil tindakan tegas terhadap mana-mana pihak yang cuba mencetuskan huru-hara atau menimbulkan sebarang bentuk provokasi sama ada penulisan, ucapan atau penyebaran berita yang boleh menyebabkan keresahan di bawah masyarakat.

Pihak polis juga akan melakukan tangkapan dan pendakwaan terhadap mana-mana orang yang melakukan perbuatan sedemikian berdasarkan peruntukan undang-undang yang sedia ada seperti Akta Hasutan 1948, Kanun Keseksaan mahupun Akta Komunikasi dan Multimedia 1988 bagi memastikan keharmonian antara kaum, bangsa dan agama terus terjaga.

Jadi Tuan Yang di-Pertua, apa yang saya ingin jelaskan di sini bahawa kertas siasatan telah pun dibuat dan telah pun diserahkan kepada Pejabat Peguam Negara untuk tindakan selanjutnya. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN CHE ALIAS BIN HAMID [KEMAMAN]

TARIKH : 18 NOVEMBER 2019

SOALAN

Minta **MENTERI PERTANIAN DAN INDUSTRI ASAS TANI** menyatakan mengenai rancangan dan usaha menggabungkan tanah sawah padi secara komersial atau koperasi supaya menjadi estet perladangan.

JAWAPAN

Tuan Yang di-Pertua,

1. Untuk makluman Ahli Yang Berhormat, program estet padi ini boleh melibatkan beberapa model pengurusan ladang secara berpusat mulai peringkat penanaman, penuaian sehingga ke pemasaran. Buat masa ini, Kerajaan berusaha menetengahkan idea penyatuan pengurusan ladang yang akan diuruskan oleh satu badan pengurusan samada seperti syarikat *Special Purpose Vehicle* (SPV) atau koperasi. Konsep penyatuan pengurusan tanah ini akan hanya melibatkan penyatuan pengurusan tanah tanpa sebarang pengambilalihan atau pertukaran hak milik tanah pesawah. Buat masa ini, beberapa program sedia ada di bawah Projek Pemacu Pertanian (PPP) seperti *Entry Point Project*, EPP#10 dan EPP#11 boleh diambil sebagai asas pelaksanaan konsep estet padi ini. Konsep estet padi ini akan memberi kesan positif kepada pemilik tanah sawah terutamanya yang bersaiz kecil apabila pengurusan tanah ini disatukan di bawah satu badan pengurusan.

2. Antara manfaat pesawah-pesawah daripada program estet padi adalah seperti berikut:

- i. Keseragaman dalam pengurusan estet padi secara efisien;
- ii. Pengurangan kos pengeluaran padi berdasarkan pelaksanaan Projek Estet Padi dilaksanakan secara berpusat selain menjimatkan sumber seperti input;
- iii. Menambah pengeluaran hasil padi melalui pelaksanaan projek secara berskala besar dan seterusnya dapat meningkatkan pendapatan pesawah; dan
- iv. Meningkatkan kecekapan pengurusan ladang di mana aktiviti penanaman padi dilaksanakan secara seragam dan mematuhi syor yang ditetapkan seperti jadual penanaman dan *Rice Check*.

3. Pertubuhan Peladang Kawasan (PPK) dan pelbagai agensi berkaitan seperti Lembaga Pertubuhan Peladang (LPP), Jabatan Pertanian (DOA) dan Institut Penyelidikan dan Kemajuan Pertanian Malaysia (MARDI) boleh menjadi pemangkin pelaksanaan konsep estet padi dan penyatuan pengurusan tanah sawah ini. Agensi berkaitan boleh memainkan peranan dalam aspek penggemblengan tenaga kerja, penyelarasan jadual gerak kerja, pengagihan sumber dan input, khidmat bimbingan dan pemasaran. Melalui estet padi, tanah sawah milik petani didaftarkan melalui PPK untuk menjadi satu kawasan pengeluaran padi yang luas dan tersusun. Dengan pelaksanaan aktiviti persawahan secara sistematik dan mendisiplinkan peladang kepada amalan pengurusan ladang yang baik (myGAP), hasil padi dapat ditingkatkan secara optima yang akhirnya akan menjana peningkatan pendapatan kepada pemilik tanah dan pesawah.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN JUGAH ANAK MUYANG @ TAMBAT
[LUBOK ANTU]**

TARIKH : 18 NOVEMBER 2019 (ISNIN)

SOALAN

Minta **MENTERI TENAGA, SAINS, TEKNOLOGI, ALAM SEKITAR DAN PERUBAHAN IKLIM** menyatakan apakah langkah drastik pihak Kerajaan dalam menangani masalah pencemaran alam sekitar khususnya daripada asap industri dan limpahan bahan cemar ke sungai dan apakah mekanisme dan peralatan yang digunakan untuk menangani isu ini.

JAWAPAN

Tuan Yang di-Pertua,

Untuk makluman Ahli Yang Berhormat,

Kawalan Pelepasan Asap

1. Pelepasan asap industri dikawal di Peraturan-Peraturan Kualiti Alam Sekeliling (Udara Bersih) 2014 atau PUB 2014. PUB 2014 dikuatkuasakan oleh Jabatan Alam Sekitar (JAS) ke atas premis yang berpotensi menjadi punca pencemaran udara, tertakluk kepada pemakaian perindustrian dan perniagaan. Mengikut rekod Jabatan Alam Sekitar (JAS), terdapat 10,984 buah premis daripada pelbagai jenis industri tertakluk di bawah PUB 2014 di seluruh negara.
2. Di bawah PUB 2014, pelepasan pencemar udara daripada industri dikawal dengan penetapan nilai batas pencemar seperti parameter habuk (*Total PM*), sulfur dioksida (SO_2), nitrogen dioksida (NO_2), karbon monoksida (CO) atau lain-lain, mengikut jenis-jenis industri seperti penanaman & kuasa, industri kimia & petrokimia atau lain-lain.
3. Antara peruntukan peraturan-peraturan di bawah PUB 2014 adalah menghendaki supaya premis industri dilengkapi dengan sistem kawalan pencemaran udara seperti *bag filter*, *electrostatic precipitator* atau *scrubber*, dan pihak industri hendaklah menjalankan pemantauan prestasi bagi komponen sistem tersebut.
4. Pihak industri adalah dikehendaki menjalankan pemantauan pelepasan udara (emission monitoring) secara berkala atau berterusan, bergantung kepada jenis parameter dan jenis industri. Pemantauan yang dijalankan secara berterusan adalah dihubungkan secara dalam talian terus dengan JAS melalui Continuous Emission Monitoring System (CEMS).
5. JAS memantau dan menjalankan pemeriksaan ke atas premis secara berkala dan secara kejutan bagi memastikan premis patuh terhadap kehendak PUB 2014 secara khususnya dan terhadap Akta

Kualiti Alam Sekeliling, 1974 secara amnya. Dari Januari hingga Oktober 2019, JAS telah menjalankan sebanyak 6,105 lawatan penguatkuasaan ke atas premis yang tertakluk di bawah PUB 2014 di seluruh negara. Dalam tempoh tersebut sebanyak 20 kes telah didakwa di mahkamah bagi pelbagai kesalahan di bawah PUB 2014.

6. Dari segi perancangan jangka masa panjang untuk memantau tahap pencemaran udara, JAS akan mensyaratkan pihak industri supaya mengisytiharkan beban pelepasan ke udara (declare emissions loading) secara dalam talian dan dihubungkan terus dengan sistem pemantauan JAS.

Kawalan Bahan Cemar

7. Kawalan terhadap buangan terjadual daripada industri dikawal di Peraturan-Peraturan Kualiti Alam Sekeliling (Buangan Terjadual) 2005. Peraturan ini dikuatkuasakan oleh Jabatan Alam Sekitar (JAS) ke atas premis yang berpotensi menjadi punca pencemaran buangan terjadual, tertakluk kepada pemakaian perindustrian dan perniagaan.

8. Di bawah peraturan ini, pengurusan buangan terjadual daripada industri dikawal dengan melalui penguatkuasaan ke atas industri dan industri dikehendaki melaporkan penghasilan buangan terjadual ke dalam sistem atas talian ESWIS dan seterusnya melupuskan buangan tersebut ke premis yang ditetapkan (dilesenkan) oleh JAS.

9. JAS memantau dan menjalankan pemeriksaan ke atas premis secara berkala bagi memastikan premis patuh terhadap kehendak peraturan secara khususnya dan terhadap Akta Kualiti Alam Sekeliling, 1974 secara amnya.

Untuk makluman Ahli Yang Berhormat

10. JAS sedang memperkukuhkan sistem pengesanan sedia ada dengan perolehan dan pemasangan 25 unit tambahan pengesan gas jenis *Photoionization Detector*, dengan izin, (PID) , yang semua akan siap dipasang sebelum penghujung tahun ini. Selain dari ini, pihak JAS juga memperolehi, satu unit *Gas Chromatograph – Mass Spectrometry*, dengan

izin (GC-MS), satu unit *Gas Chromatograph - Flame Ionization Detector*, dengan izin, (GC-FID), dan enam unit mudah alih *Cerex Fourier Transform Infrared*, dengan izin, (FTIR).

11. Disamping itu, 15 unit *Particulate Analyser* dan 10 unit *Gas Analyser*, dengan izin, sedang diperolehi menerusi proses tender terbuka untuk diagihkan kepada cawangan-cawangan JAS Negeri.

12. Akhirnya, Jabatan Alam Sekitar dan Kementerian Tenaga, Sains, Teknologi , Alam Sekitar dan Perubahan Iklim sedang menggubal baharu Akta Alam Sekitar bagi menggantikan Akta Kualiti Alam Sekeliling (AKAS) 1974. Bagi memastikan Akta baharu Alam Sekitar lebih relevan dan berkesan, pihak Kementerian telah melantik Akademi Sains Malaysia untuk mengkaji kelemahan AKAS dan mencadangkan pengukuhan. Secara amnya, skop Akta baharu Alam Sekitar akan diperluaskan supaya merangkumi aktiviti-aktiviti baharu manakala penalti kesalahan dijangka lebih tegas. Kajian oleh ASM dijangka siap menjelang penghujung tahun 2019 dan Rang Undang-Undang akan dimuktamadkan di peringkat Kementerian. Pada waktu ini, Rang Undang-Undang Akta baharu Alam Sekitar dijangka dibentangkan pada sesi kedua Parlimen tahun 2020.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN HAJI WAN HASSAN BIN MOHD RAMLI
[DUNGUN]**

TARIKH : 18 NOVEMBER 2019 (ISNIN)

SOALAN NO. 14

Minta **MENTERI PENDIDIKAN** menyatakan apakah langkah yang diambil bagi menangani masalah penggunaan vape dan shisha stick dalam kalangan pelajar sekolah yang semakin berleluasa.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa memandang serius dan mengambil langkah proaktif dalam menangani isu merokok termasuk penggunaan rokok elektrik atau *vape* dalam kalangan murid sekolah. Kementerian Pendidikan telah mengeluarkan Surat Siaran KPM Bilangan 17 Tahun 2015 bertarikh 1 Disember 2015: Larangan Penggunaan Rokok Elektrik atau *Vape* di Sekolah. KPM telah memaklumkan larangan penggunaannya sama ada membawa, menghisap, mengedar, menjual, memiliki, menyimpan, mempamerkan, menyiarkan, menyebarkan atau mengiklankan rokok eletronik atau *vape* termasuk cecair (*liquid*) dan alatan yang berkaitan dengannya.

KPM berperanan dan berfokus kepada Program Pendidikan Pencegahan di semua sekolah sama ada berbentuk ceramah, karnival, pertandingan, pameran serta peningkatan jati diri secara intrapersonal dan interpersonal. Di samping itu, program intervensi turut dilaksanakan bagi menangani isu tersebut dalam kalangan murid. KPM juga telah

menyediakan modul sebagai rujukan kepada guru-guru bimbingan dan kaunseling di sekolah bagi mengendalikan murid yang ketagihan merokok seperti berikut:

1. Garis Panduan Pengendalian Murid Sekolah Yang Merokok hasil kerjasama KPM dan Kementerian Kesihatan Malaysia (KKM); dan
2. Modul Kaunseling Berfokus Program Nafas Segar bagi Pendidikan Pencegahan Rokok.

Selain itu, KPM turut menerapkan tentang bahaya gejala rokok dalam pelaksanaan aktiviti kokurikulum di sekolah iaitu melalui program peningkatan jati diri dan sahsiah untuk murid-murid dalam Pasukan Badan Beruniform (PBB). KPM turut bekerjasama dengan agensi kerajaan dan juga agensi bukan kerajaan bagi memberi ruang dan peluang kepada murid untuk menyertai pelbagai aktiviti sama ada di peringkat negeri dan kebangsaan.

Di samping itu juga, setiap murid digalakkan untuk melibatkan diri secara aktif dalam aktiviti sukan yang dianjurkan di sekolah selaras dengan Dasar 1Murid 1Sukan. Penglibatan murid secara aktif dalam aktiviti sukan dapat membendung daripada melakukan kegiatan yang tidak berfaedah, mengamalkan gaya hidup sihat dan bebas rokok. Walau bagaimanapun kerjasama semua pihak termasuk sekolah, ibu bapa dan komuniti adalah amat diperlukan bagi memastikan murid-murid tidak terlibat dengan penularan gejala rokok.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE DUA,
PARLIMEN EMPATBELAS**

PERTANYAAN : JAWAB LISAN

DARIPADA : YB PUAN WONG SHU QI (KLUANG)

TARIKH : 18 NOVEMBER 2019

SOALAN

PUAN WONG SHU QI [KLUANG] minta **MENTERI DALAM NEGERI** menyatakan sama ada sistem MACS akan dibuka kepada warganegara Singapura yang kerap keluar masuk Malaysia melalui dua pintu masuk Johor Bahru supaya mesin pengimbas auto MACS sedia ada digunakan sepenuhnya serta mengurangkan orang ramai beratur di kaunter manual.

JAWAPAN

Tan Sri Yang Di Pertua,

Kementerian Dalam Negeri (KDN) dan Jabatan Imigresen Malaysia (JIM) telah memperkenalkan sistem *Malaysia Automated Clearance System* (MACS) pada tahun 2006. Sistem MACS ini dibuka kepada warganegara Singapura serta pemegang pas jangka panjang Malaysia dan Singapura yang kerap berulang alik antara Malaysia dan Singapura di samping syarat-syarat lain yang ditetapkan.

Untuk makluman Ahli Yang Berhormat, berdasarkan pengumuman inisiatif Belanjawan 2020 baru-baru ini, Kerajaan telah meluluskan peruntukan sebanyak RM1.68 juta bagi menambah enam (6) unit *autogate* MACS di CIQ Bangunan Sultan Iskandar (BSI), Johor Bahru. Enam (6) unit tambahan ini adalah tambahan kepada keseluruhan 16 unit *autogate* MACS yang akan ditempatkan di CIQ BSI, CIQ Kompleks Sultan Abu Bakar, JB Sentral dan CIQ Woodlands Train Checkpoint berdasarkan kelulusan peruntukan tahun 2019. Kemudahan MACS kini dalam proses perolehan KDN dan akan dibuka semula kepada pengguna yang berdaftar sebaik sahaja proses pemasangan infrastruktur dan pembangunan sistem baharu MACS selesai pada suku tahun kedua 2020.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : DATO' SERI HAJI IDRIS BIN JUSOH [BESUT]

TARIKH : 18 NOVEMBER 2019 (ISNIN)

SOALAN

Minta **MENTERI PENDIDIKAN** menyatakan apakah status terkini Projek Tenusu Kambing yang dilaksanakan oleh Universiti Sultan Zainal Abidin (UniSZA) khasnya berkaitan hasil pembentangan laporan akhir projek ini kepada Kementerian pada Ogos 2019.

JAWAPAN

Tuan Yang di-Pertua,

Untuk makluman Ahli Yang Berhormat, Projek Tenusu Kambing ini merupakan salah satu projek di bawah Dana Penyelidikan Kementerian Pendidikan Malaysia (KPM) berkaitan penternakan kambing tenusu. Projek ini bermatlamat untuk menghasilkan inovasi yang berkeupayaan meningkatkan penghasilan susu melalui kawalan pemakanan berasaskan hasil penyelidikan. Projek ini dapat memberikan manfaat kepada penternak kambing melalui hasil peningkatan penghasilan susu yang berkualiti serta penghasilan anak kambing jantan melalui teknologi inseminasi buatan.

Projek ini juga menghasilkan inovasi kandang kambing mesra alam sekitar dengan kos penyelenggaraan yang lebih rendah berbanding kaedah penternakan konvensional. Projek ini juga menggunakan Internet Perbagai Benda (*Internet of Things - IoT*) bagi pelaksanaan penternakan pintar di mana pemantauan ternakan adalah menggunakan IoT sebagai langkah kawalan berstruktur dan teratur dengan bantuan teknologi.

Hasil projek ini diterjemah kepada komuniti penternak setempat dalam membantu menyelesaikan masalah yang dihadapi melalui hasil penyelidikan dan inovasi UniSZA.

Sekian, terima kasih.

RJM91

**PEMBERITAHUAN PERTANYAAN LISAN
DEWAN RAKYAT MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATO' HAJI MOHD FASIAH BIN HAJI
MOHD FAKEH [SABAK BERNAM]**

TARIKH : 18 NOVEMBER 2019

SOALAN NO. 17

Dato' Haji Mohd Fasih bin Haji Mohd Fakeh [Sabak Bernam] minta **MENTERI PEMBANGUNAN WANITA, KELUARGA DAN MASYARAKAT** menyatakan bilangan dan jumlah penyertaan tenaga kerja wanita di semua bidang dan sektor pekerjaan di negara ini dan nyatakan setakat manakah penyertaan wanita di peringkat pengurusan tertinggi dan pembuat dasar dan keputusan di sektor awam dan swasta masa kini serta langkah Kementerian bagi memberikan peluang pekerjaan yang sesuai dan seimbang untuk wanita-wanita di negara ini.

JAWAPAN

Tuan Yang di-Pertua,

Statistik yang dikeluarkan oleh Jabatan Perangkaan Malaysia menunjukkan terdapatnya peningkatan penyertaan tenaga buruh wanita di negara ini iaitu daripada 54.7% pada tahun 2017 kepada 55.2% pada tahun 2018. Bagi meningkatkan penyertaan wanita dalam tenaga buruh, Kerajaan juga telah menetapkan sasaran kepada 56.5% pada tahun 2020.

Seterusnya, bagi penglibatan wanita di peringkat pengurusan tertinggi dan sebagai pembuat keputusan di sektor awam, rekod Jabatan Perkhidmatan Awam (JPA) memperlihatkan 36.10% wanita menyandang jawatan sektor utama awam (JUSA) pada tahun 2018 berbanding tiga tahun sebelumnya iaitu 35.10% pada tahun 2015. Di sektor swasta, penyertaan wanita di peringkat pembuat keputusan melalui jumlah pengisian kerusi Ahli Lembaga Pengarah di 100 buah syarikat-syarikat teratas tersenarai awam adalah 24.4% peratus pada tahun 2018 berbanding 14.0% pada tahun 2015.

Bagi membolehkan golongan wanita terus menyumbang kepada pembangunan negara, beberapa inisiatif telah diperkenalkan oleh Kerajaan untuk membantu mereka mengimbangi peranan dalam keluarga dan kerjaya. Ini termasuklah mewujudkan persekitaran kerja yang lebih kondusif melalui pelaksanaan Waktu Bekerja Fleksi (WBF) oleh JPA dan juga dengan mewajibkan agensi Kerajaan mewujudkan TASKA di tempat kerja dan bagi maksud ini, Kerajaan telah meningkatkan peruntukan kepada RM30 juta untuk menyediakan lebih banyak TASKA terutamanya di hospital dan sekolah. Di sektor swasta pula, Kerajaan melalui Talent Corporation Malaysia Berhad (TalentCorp) telah memperkenalkan Program *Career Comeback* semenjak tahun 2015 bagi menggalakkan wanita yang telah berhenti kerja sebelum ini untuk kembali berkerjaya.

Bagi meningkatkan penyertaan wanita sebagai pembuat keputusan di sektor awam pula, Kementerian ini turut melaksanakan beberapa program pembangunan kapasiti dalam aspek kepimpinan khususnya

SOALAN NO. 17

dalam kalangan pegawai Pengurusan dan Profesional di peringkat pertengahan bagi mempersiapkan mereka untuk menyandang jawatan yang lebih tinggi. Di sektor swasta pula, peranan ini disokong oleh Suruhanjaya Sekuriti melalui Kod Tadbir Urus Korporat dan juga oleh Kelab 30% Malaysia dengan melaksanakan program seperti *mentoring* bagi mempersiapkan wanita yang berpotensi sebagai Ahli Lembaga Pengarah.

Kerajaan juga ingin menyeru kepada semua pihak agar sama-sama memainkan peranan untuk meningkatkan lagi penyertaan wanita dalam semua bidang dan meningkatkan usaha dalam mengarusperdanakan gender dalam polisi dan juga pelaksanaan program dan aktiviti. Walaupun laporan *Global Gender Gap Indeks 2018* menunjukkan peningkatan kedudukan Malaysia di tangga 101 daripada 149 buah negara berbanding tangga 104 pada tahun 2017, didapati masih terdapat beberapa bidang dalam pelaporan tersebut yang perlu diberikan tumpuan kerana masih belum memenuhi skor penuh gender pariti iaitu 1.0 dan ini termasuklah kurangnya penglibatan wanita dalam *political empowerment* yang masih berada di skor 0.071 dan *economic participation dan opportunity* di skor 0.656.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

DARIPADA : YB ARTHUR JOSEPH KURUP (PENSIANGAN)

TARIKH : 18 NOVEMBER 2019

SOALAN

TUAN ARTHUR JOSEPH KURUP [PENSIANGAN] minta **MENTERI DALAM NEGERI** menyatakan apakah langkah yang diambil untuk memastikan pelajar asing yang datang ke Malaysia tidak menyalahgunakan visa pelajar.

JAWAPAN

Tuan Yang Di Pertua,

Untuk makluman Ahli Yang Berhormat, warganegara asing yang melanjutkan pengajian di institusi pendidikan hendaklah mengemukakan permohonan kepada *Education Malaysia Global Services* (EMGS) yang merupakan pusat sehenti bagi pengambilan pelajar antarabangsa di Malaysia.

Sebagai mekanisme kawalan, EMGS akan membuat saringan akademik bagi memastikan calon pelajar menepati syarat kemasukan kursus selain mewajibkan pengisytiharan kesihatan. Bagi memastikan pelajar asing tidak menyalahgunakan pas pelajar seperti tinggal lebih masa dan melanggar syarat pas, institusi pendidikan yang bertanggungjawab di atas kemasukan pelajar hendaklah memantau keberadaan dan juga

SOALAN NO : 18

disiplin pelajar. Pihak Kementerian akan membatalkan kelulusan atau tidak akan mempertimbangkan pembaharuan lesen pengambilan pelajar asing bagi institusi pendidikan yang gagal memastikan keberadaan pelajar. Manakala bagi kemasukan pelajar antarabangsa ke Sabah dan Sarawak adalah melalui Jabatan Imigresen Malaysia di kedua-dua negeri tersebut.

Jabatan Imigresen Malaysia sentiasa melakukan pemantauan serta operasi bersepadu secara berterusan ke atas institusi pendidikan di Malaysia. Bagi tahun 2017 sehingga 31 Julai 2019, sejumlah 235 orang pelajar telah ditangkap melalui operasi bersepadu yang dilakukan oleh Jabatan Imigresen Malaysia atas kesalahan menyalahgunakan pas pelajar mereka di bawah Peraturan 39(b) Peraturan-Peraturan Imigresen 1963.

Mana-mana individu yang didapati melanggar atau gagal mematuhi syarat Pas, Permit atau Pas Sempadan boleh dikenakan tindakan apabila disabitkan, hukuman penjara kepada tempoh tidak melebihi 6 bulan atau didenda tidak melebihi RM1,000 atau kedua-duanya sekali di bawah Peraturan 39(b) Peraturan Imigresen 1963.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN AKMAL NASRULLAH BIN MOHD.
NASIR [JOHOR BAHRU]**

TARIKH : 18 NOVEMBER 2019 (ISNIN)

SOALAN NO. 19

Minta **MENTERI PENDIDIKAN** menyatakan usaha-usaha yang diambil bagi meningkatkan kesedaran golongan pelajar sekolah terhadap perkembangan politik semasa ekoran daripada kejayaan kempen #Undi18 sebelum ini.

JAWAPAN

Tuan Yang di-Pertua,

Kementerian Pendidikan Malaysia (KPM) telah dan akan terus mengambil langkah yang sewajarnya bagi meningkatkan kesedaran murid sebagai persediaan menjadi pengundi apabila berumur 18 tahun. Usaha KPM ini dilaksanakan melalui pendekatan kurikulum, kokurikulum dan pelbagai program bagi memberi pendedahan dan pengetahuan kepada murid termasuk mengadakan kerjasama dengan Jabatan atau Agensi Kerajaan yang berkaitan.

Untuk makluman Ahli Yang Berhormat, KPM telah memasukkan tajuk dan kandungan yang berkaitan dengan Demokrasi dan Perlembagaan dalam kurikulum Sejarah yang sedang dilaksanakan pada masa kini. Tajuk ini diajar kepada murid berbeza-beza mengikut aras dan tahap kebolehan serta keupayaan murid sama ada di sekolah rendah atau sekolah menengah. Melalui pelaksanaan Pendidikan Sivik pula, KPM turut memberi pendedahan kepada murid di awal usia sebagai usaha meningkatkan literasi politik pengundi muda dengan membincangkan beberapa tajuk seperti Sistem Demokrasi Berparlimen, Pemupukan Jati Diri, Sistem Raja Berperlembagaan, Rukun Negara, Semangat Patriotik dan Cintai Malaysia.

Berikut merupakan antara kerjasama yang dilaksanakan oleh KPM dengan jabatan/agensi Kerajaan yang berkaitan bagi memberi pendedahan dan pengetahuan sebagai persediaan selaras dengan #Undi18:

1. Mengadakan kerjasama dengan Jabatan Penerangan Malaysia untuk melaksanakan aktiviti patriotisme melalui Kelab Malaysiaku. Aktiviti yang dijalankan oleh kelab ini adalah Amalan Demokrasi Berparlimen, Kembara Kelab Malaysiaku, Wacana Kemerdekaan, Kem Aspirasi Pelajar dan Sketsa Rukun Negara;
2. Mengadakan kerjasama dengan Jabatan Perpaduan Negara dan Integrasi Nasional (PERPADUAN) untuk melaksanakan pelbagai aktiviti berteraskan kepada pengamalan Rukun Negara. Selaras

dengan prinsip ketiga Rukun Negara iaitu Keluruhan Perlembagaan, penerapan sistem demokrasi dilaksanakan melalui aktiviti Mini Parlimen, Bulan Kesedaran Perlembagaan, Bulan Kemerdekaan, Lawatan Kenegaraan dan Forum berkaitan Perlembagaan; dan

3. Mengadakan kerjasama dengan SPR Suruhanjaya Pilihanraya (SPR) menjalankan sesi sindikasi dan simulasi pemilihan ketua murid melalui mekanisme pilihanraya sebagai projek rintis di sekolah. Dapatan program rintis tersebut dijadikan asas kepada penyediaan garis panduan pelaksanaan proses pilihanraya di sekolah bagi tujuan pemilihan ketua murid.

Melalui Akademi Pilihan Raya (APR), SPR turut menjalankan Program Pendidikan Sivik di semua sekolah menengah dan meneruskan Program Pendidikan Pengundi sedia ada. Berhubung dengan perkara ini, SPR bersama KPM telah merancang untuk menganjurkan "Program Pendidikan Sivik - *Road To School*" yang akan melibatkan 2,436 buah sekolah menengah di Malaysia pada tahun 2020. Program tersebut akan melibatkan para pelajar Tingkatan 4 dan Tingkatan 6 yang dianggarkan seramai 545,000 orang.

Kementerian percaya bahawa dengan usaha berterusan dan kerjasama yang dilaksanakan akan dapat mempersiapkan murid-murid mengetahui hak dan tanggungjawab sebagai pengundi yang akan menentukan hala tuju Kerajaan dan masa depan negara.

Sekian, terima kasih.

PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KE EMPAT BELAS

PERTANYAAN : LISAN

DARIPADA : DATIN MASTURA BINTI MOHD YAZID
[KUALA KANGSAR]

TARIKH : 18 NOVEMBER 2019 (ISNIN)

SOALAN

Minta **MENTERI PERTANIAN DAN INDUSTRI ASAS TANI** menyatakan apakah usaha berterusan Kementerian dalam memudahkan cara untuk para peladangnita mendapatkan pensijilan keselamatan makanan (*food security certification*) untuk produk-produk akhir mereka, dan apakah jaminan Kementerian dalam memastikan pensijilan tersebut memenuhi piawaian pensijilan keselamatan di peringkat antarabangsa.

JAWAPAN

Yang Dipertua,

1. Kerajaan melalui Kementerian Pertanian dan Industri Asas Tani (MOA) komited dalam membantu Peladangnita dalam mendapatkan pensijilan keselamatan makanan (*food security certification*) bagi produk segar dan produk asas tani.
2. Pensijilan keselamatan makanan untuk produk segar dilaksanakan menerusi Program Pengukuhan Skim Amalan Pertanian Baik Malaysia (myGAP) dan Skim Organik Malaysia (myOrganic) manakala bagi produk asas tani dilaksanakan menerusi Skim Pensijilan Makanan Selamat Tanggungjawab Industri (MeSTI) dan Sijil Pengesahan Halal Malaysia (HALAL).
3. Di antara usaha berterusan Kementerian dalam memudah cara untuk para Peladangnita mendapatkan pensijilan keselamatan makanan bagi produk segar dan produk asas tani adalah seperti berikut :
 - memberi khidmat nasihat dan bimbingan kepada ahli serta melakukan pemeriksaan tapak, analisis hasil dan analisis air secara percuma oleh Pegawai Pengembangan Jabatan di bawah MOA;
 - melaksanakan *roadshow* dan promosi dalam bentuk pameran, jualan dan taklimat kepada pengguna di seluruh negara mengenai kelebihan mendapatkan produk yang selamat dimakan. Contoh program seperti Pameran Pertanian, Hortikultur dan Pelancongan Agro Antarabangsa (MAHA) dan Hari Peladang, Penternak dan Nelayan Kebangsaan (HPPNK);
 - melaksanakan program *capacity building* dengan pegusaha-pengusaha berpotensi bagi mempromosikan dan menggalakkan amalan pertanian baik oleh Jabatan di bawah MOA;

SOALAN NO : 20

- memberi galakan insentif secara *in-kind* kepada pengusaha sebanyak RM5,000 hingga RM50,000 tertakluk kepada keperluan ladang dan pengesyoran Jabatan yang memenuhi kriteria pensijilan untuk mendapatkan pensijilan myGAP seperti kemudahan dan infrastruktur ladang yang memenuhi amalan pertanian baik;
- memberi khidmat nasihat dan latihan menerusi Bengkel Mudahcara Halal (kerjasama bersama Halal Industry Development Corporation) dan Bengkel Pensijilan MeSTI (kerjasama bersama Kementerian Kesihatan Malaysia); dan
- menyediakan geran pepadanan kepada pengusaha produk asas tani sehingga RM200,000 untuk penambahbaikan premis meliputi penambahbaikan ruang melalui pengubahsuaian susun atur dan binaan bangunan termasuk sistem perparitan dan kumbahan yang mematuhi kehendak pensijilan MeSTI dan Halal.

4. Skim pensijilan-pensijilan yang telah dinyatakan di atas iaitu myGAP, myOrganic, MeSTI dan HALAL adalah skim pensijilan yang komprehensif berdasarkan kepada Malaysia Standard (MS) dan memenuhi piawaian pensijilan keselamatan di peringkat antarabangsa dengan tempoh sahlaku sijil selama dua (2) tahun. Pemantauan berkala sebelum tamat tempoh sahlaku dilaksanakan bagi memastikan pengusaha mematuhi syarat-syarat yang telah ditetapkan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

**DARIPADA : YB TUAN KARUPAIYA A/LMUTUSAMI
(PADANG SERAI)**

TARIKH : 18 NOVEMBER 2019

SOALAN

TUAN KARUPAIYA A/L MUTUSAMI [PADANG SERAI] minta **MENTERI DALAM NEGERI** menyatakan perkembangan siasatan polis ke atas pendakwah kontroversi Zakir Naik dan tindakan yang diambil terhadap Zakir Naik.

JAWAPAN

Tuan Yang Di Pertua,

Pihak Polis Diraja Malaysia telah menerima laporan mengenai ceramah oleh Dr. Zakir Naik di Kelantan pada 7-9 Ogos 2019. Ucapan beliau telah disensasikan secara meluas di media cetak dan media sosial di mana beliau didakwa telah mempertikaikan kesetiaan kaum India di negara ini sehingga menimbulkan keresahan dalam kalangan mereka. Dalam hubungan ini, Dr. Zakir Naik mendakwa bahawa ucapan beliau telah dipetik di luar konteks berhubung kenyataannya mengenai masyarakat India di Malaysia.

Untuk makluman Yang Berhormat, pihak Polis Diraja Malaysia telah membuka dua kertas siasatan terhadap pendakwah Dr. Zakir Naik. Kedua-dua kertas siasatan ini adalah bagi kesalahan yang didakwa dilakukan di bawah Seksyen 504 Kanun Keseksaan dan Seksyen 233 Akta Komunikasi dan Multimedia 1998. Kedua-dua kertas siasatan ini dibuka berdasarkan kepada laporan polis yang telah diterima dan dirujuk kepada Timbalan Pendakwaraya untuk arahan lanjut.

Pada masa ini, Dr. Zakir Naik dilarang memberikan ceramah secara umum sehingga siasatan polis selesai. Beliau juga diingatkan supaya tidak membuat sebarang kenyataan berkenaan isu-isu politik, perkauman dan perkara-perkara yang menyentuh sensitiviti masyarakat di Malaysia. Perkara ini adalah bagi mengelakkan isu beliau daripada dimanipulasikan oleh pihak-pihak tertentu sehingga boleh menjadi sentimen perkauman dan agama yang berpotensi menjejaskan ketenteraman awam.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN AHMAD JOHNIE BIN ZAWAWI [IGAN]

TARIKH : 18 NOVEMBER 2019 (ISNIN)

SOALAN NO. 22

Minta **MENTERI PENDIDIKAN** menyatakan berapa buah sekolah di kawasan Parlimen Igan yang akan dibina baru atau dibaik pulih di bawah perancangan sekolah daif. Senaraikan sekolah-sekolah yang terlibat dan bila akan dilaksanakan serta nyatakan kos setiap satu.

JAWAPAN

Tuan Yang di-Pertua,

Untuk makluman Ahli Yang Berhormat, terdapat beberapa sekolah di bawah Parlimen Igan yang telah disenaraikan untuk dinaik taraf melalui beberapa projek pembangunan yang akan dilaksanakan oleh Kementerian Pendidikan Malaysia (KPM). Bagi projek RM1 billion yang melibatkan tiga (3) fasa, dua (2) buah sekolah iaitu SK Bawang Tian, Daro dan SK Kg.Tebaang, Daro telah dicadangkan untuk dinaik taraf di dalam Fasa 2. Manakala empat (4) buah sekolah di daerah Daro yang telah dicadang untuk dinaik taraf dalam Fasa 3 ialah SK Sok, SK Abang Buyuk, SK Kg.Betanak dan SK Kg.Pergau.

Selain daripada itu, pembinaan SMK Matu, Daro telah diluluskan dalam projek RMKe-11 (*rolling plan 2*) iaitu melibatkan pembinaan gantian penuh 28 bilik darjah, asrama bagi 250 murid dan kemudahan lain dengan anggaran kos sebanyak RM75 juta. Projek ini di bawah seliaan Jabatan Kerja Raya, Sarawak. Penawaran tender dijangka pada Disember 2019. Kerja-kerja akan dilaksanakan sebaik perolehan dimuktamadkan.

Untuk makluman Ahli Yang Berhormat, terdapat tujuh (7) buah sekolah daif di Parlimen Igan telah dinaik taraf dan dibangunkan semula dengan kos projek berjumlah RM65.31 juta meliputi enam (6) projek yang dilaksanakan pada tahun 2018 iaitu SK Kpg Pangtray, SK Ulu Daro, SK Nangar, SK Orang Kaya Sergunim, SK Bruan Mapal dan SK Kpg Penasu Daro manakala sebuah sekolah dinaik taraf pada tahun 2017 iaitu SK Kuala Matu. Kesemua projek ini telah siap sepenuhnya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : PUAN RUSNAH BINTI ALUAI
[TANGGA BATU]
TARIKH : 18 NOVEMBER 2019 (ISNIN)

SOALAN NO. 23

Minta **MENTERI PENDIDIKAN** menyatakan sama ada Kementerian sudah mengkaji semula kursus-kursus yang ada di IKBN, Kolej Komuniti, Institut Kemahiran MARA dan lain-lain kepada kursus-kursus yang memberi nilai pendapatan yang tinggi seperti perniagaan atas talian, kursus-kursus untuk keperluan industri minyak dan gas dan sebagainya.

JAWAPAN

Tuan Yang di-Pertua,

Untuk makluman Ahli Yang Berhormat, Institut Kemahiran Belia Negara (IKBN) dan Institut Kemahiran MARA adalah di bawah seliaan Kementerian Belia dan Sukan dan Kementerian Pembangunan Luar Bandar.

Di peringkat kolej komuniti di bawah Kementerian Pendidikan Malaysia (KPM) menawarkan program sepenuh masa dan program Pembelajaran Sepanjang Hayat (PSH) iaitu kursus pendek kepada komuniti amnya dan masyarakat setempat khususnya. Program PSH dilaksanakan secara fleksibel, mengikut permintaan warga setempat, bertujuan untuk membentuk komuniti yang lebih dinamik dan membantu dalam meningkatkan pengetahuan, kemahiran serta taraf sosio ekonomi.

Enam kumpulan fokus program ini ialah golongan miskin tegar, orang asli, orang kurang upaya (OKU), ibu tunggal, belia, warga emas dan pesara. Terdapat 22 bidang kemahiran yang ditawarkan oleh kolej komuniti, antaranya adalah Katering dan Sajian; Jahitan dan Pakaian; Komputer dan Teknologi Maklumat; Perniagaan dan Keusahawanan; Kerohanian dan Keagamaan; Kecantikan dan Dandanan; Grafik dan Multimedia; Program Industri; serta Elektrik dan Elektronik.

Pada tahun 2016 dan 2017, kolej komuniti telah berkerjasama dengan pihak *Malaysia Digital Economy Corporation* (MDEC) melalui program eUsahawan Mikro dan eRezeki. Sebanyak 5,255 penyertaan program eUsahawan Mikro dan sebanyak 6,036 penyertaan eRezeki.

Bermula tahun 2017, kolej komuniti juga bekerjasama dengan Kementerian Perdagangan Dalam Negeri Dan Hal Ehwal Pengguna (KPDNHEP) melalui Program Transformasi Minda (PTM) untuk melaksanakan program keusahawanan dengan tajaan di bawah KPDNHEP. Pada tahun 2017, seramai 713 peserta dan pada tahun 2018 seramai 215 peserta telah menyertai PTM. Bagi pelaksanaan PTM tahun 2019, KPDNHEP mensasarkan PTM dilaksanakan dengan 19 kolej komuniti dengan 20 sesi program.

Pada tahun 2018, sebanyak 2,579 penyertaan dalam kursus berkaitan perniagaan atas talian telah dilaksanakan dan sehingga Ogos 2019, sebanyak 1,558 penyertaan dalam kursus berkaitan perniagaan atas talian telah dilaksanakan. Antaranya kursus Shopee: *Online Marketing, Basic Digital & Facebook Marketing*, Usahawan Atas Talian (*Digital Marketing & Online Business*) dan *Top Biz Online*.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

**DARIPADA : YB DATO' SRI NANCY SHUKRI
(BATANG SADONG)**

TARIKH : 18 NOVEMBER 2019

SOALAN

DATO' SRI HAJAH NANCY SHUKRI [BATANG SADONG] minta **MENTERI DALAM NEGERI** menyatakan langkah yang diambil untuk mengatasi isu penyalahgunaan dadah sintetik yang muncul baru-baru ini di Sarawak dan jumlah bilangan terkini pelajar positif penyalahgunaan dadah sintetik untuk tahun 2019.

JAWAPAN

Tuan Yang Di Pertua,

Kerajaan amat serius dalam menyelesaikan isu penyalahgunaan pelbagai jenis dadah. Dalam menangani isu penyalahgunaan dadah ini, Kementerian Dalam Negeri melalui Agensi Antidadah Kebangsaan (AADK) giat melaksanakan aktiviti pencegahan dan penguatkuasaan di seluruh negara termasuk di Sarawak.

Bagi aktiviti pencegahan, AADK telah melaksanakan Program Pendidikan Pencegahan yang melibatkan komuniti dan Jabatan Kerajaan lain serta Badan Bukan Kerajaan (NGO) sebagai agen yang membantu AADK dalam memastikan keberkesanan program yang telah dirancang dan dapat disempurnakan dengan kerjasama semua pihak.

Antara program yang telah dilaksanakan ialah Program Keluarga Bebas Dadah, Program Institusi Pendidikan Bebas Dadah, Program Tempat Kerja Bebas Dadah, Program Komuniti Bebas Dadah dan lain-lain. Selain itu, AADK juga telah memperkenalkan Projek Rintis bagi membasmi penyalahgunaan dadah secara bersepadu di 12 kawasan berisiko tinggi di seluruh negara. Projek rintis ini membabitkan penyertaan 9 Kementerian, 15 agensi, dan Badan Bukan Kerajaan (NGO), di mana tindakan holistik dan menyeluruh dapat dibuat menerusi pembabitan bersama sekaligus akan memberi lebih impak positif kepada komuniti. Projek ini juga memberi fokus terhadap elemen Jasmani, Emosi, Rohani, Intelek dan Sahsia masyarakat setempat.

Bagi aktiviti penguatkuasaan pula, AADK sentiasa bersedia dalam menjalankan operasi terhadap aduan-aduan berkaitan penyalahgunaan dadah yang dikemukakan oleh orang awam. Ops Cegah yang dijalankan oleh Unit Penguatkuasaan dan Keselamatan AADK akan menahan mana-mana individu yang disyaki menagih dadah di bawah seksyen 3(1) Akta Penagih Dadah (Rawatan dan Pemulihan) 1983. Mereka akan diberi rawatan dan pemulihan di dalam Pusat Pemulihan atau dikenakan pengawasan dalam komuniti.

Bagi mereka yang dikenakan pengawasan dalam komuniti, iaitu Orang Kena Pengawasan (OKP), AADK melaksanakan program *Home Visit* bagi memberi sokongan kepada OKP yang terlibat untuk kekal pulih dan dalam masa yang sama, dapat menyalurkan maklumat kepada keluarga OKP dan masyarakat setempat berkenaan perkhidmatan-perkhidmatan yang disediakan oleh Kerajaan.

Tuan Yang Di Pertua,

Bagi menjawab pertanyaan kedua Yang Berhormat, sehingga Julai 2019, ujian urin telah dilaksanakan terhadap 39,538 orang pelajar (13-17 tahun) dan didapati 3.06% daripada jumlah yang diuji tersebut atau 1,210 orang pelajar adalah positif dadah. Daripada jumlah yang positif dadah tersebut, seramai 825 orang pelajar atau 2.09% daripada jumlah yang diuji adalah didapati positif dadah sintetik.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI MOHD FASIAH BIN HAJI MOHD
FAKEH [SABAK BERNAM]**

TARIKH : 18 NOVEMBER 2019 (ISNIN)

SOALAN NO. 25

Minta **MENTERI PENDIDIKAN** menyatakan kadar peratus kebolehpasaran (*employability*) graduan IPT dan IPTS negara ini dan nyatakan setakat manakah latihan industri dan latihan “*internship*” dapat membantu meningkatkan kebolehpasaran graduan serta nyatakan setakat manakah industri mendapat manfaat dari kedua-dua program latihan ini.

JAWAPAN

Tuan Yang di-Pertua,

Kementerian Pendidikan Malaysia (KPM) telah melaksanakan pelbagai inisiatif demi melahirkan graduan yang kompeten dan boleh bersaing dalam dunia kerjaya yang semakin mencabar. Antara inisiatif yang dilaksanakan adalah menambahbaik dan mempelbagaikan penawaran program pengajian di institusi pendidikan tinggi (IPT) di Malaysia. Inovasi pendidikan yang dilaksanakan bagi menambah nilai graduan ialah memperkenalkan penawaran program secara kerjasama industri iaitu berkonsepkan *work-based learning*. Inisiatif ini juga lebih dikenali sebagai program 2u2i, 3u1i atau 2u1i. Konsep pelaksanaan program ini ialah pelajar akan mengikuti 2 tahun pengajian di institusi dan 1 tahun di industri atau mana-mana tempoh yang ditetapkan oleh institusi-industri. Kelebihan yang dapat diperoleh oleh

pelajar ialah pelajar dapat menjalani pengajian secara terus di industri dan penilaian di industri juga dibuat oleh penyelia industri yang terlatih.

KPM juga telah memperkenalkan Program *Apprenticeship* seperti Jabatan Pendidikan Politeknik dan Kolej Komuniti telah melaksanakannya dengan Syarikat Brahim Stas Sdn. Bhd. yang menawarkan pekerjaan kepada graduan dan memberikan latihan setelah masuk bekerja. Selain itu, program SIP plus (Structured Internship Program) berkonsepkan perantisan yang memaksimumkan penggunaan Latihan Industri Semester Akhir (LISA) yang diwajibkan kepada semua pelajar politeknik. Peserta program ini akan diserap bekerja setelah tamat latihan industri.

Pengenalan *Academia Talent Exchange Programme* (Al-xChange): *CEO @ Faculty Programme* yang memberi peluang kepada pelajar untuk memahami dunia sebenar melalui perkongsian pengalaman 72 orang CEO daripada segi pengurusan pentadbiran, kepimpinan dan teknologi di lapangan. Selain itu, integrasi dan sinergi antara tenaga pakar industri dengan penyelidik universiti dan pelajar dapat diwujudkan. Pihak IPT juga berjaya beralih daripada beroperasi secara bersendirian kepada *quadruple helix* iaitu ekosistem inovasi yang saling berkaitan antara akademik, industri, kerajaan dan komuniti yang telah membentuk perkongsian sumber untuk pembangunan negara.

Beberapa inisiatif jalinan kolaborasi antara akademik dan industri lain turut dilaksanakan seperti Engineering@UM-Industrial *Innovation Centre*, kerjasama Samsung Malaysia Universiti Teknikal Melaka, kerjasama Ericsson Malaysia dengan Universiti Teknologi Malaysia untuk rantau Asia Tenggara yang juga merupakan program pertama seumpamanya di Malaysia dan terletak di kampus UTM Kuala Lumpur dan CIMB Investment Bank dengan kerjasama UiTM Segamat Johor. Selain itu program Pusat Kecemerlangan Industri [*Industry Centre of Excellence* (ICoE)] iaitu *Microsoft Professional Program Data Science* dengan kerjasama *Microsoft* Malaysia yang melatih seramai 240 orang pelajar di dalam bidang pengetahuan sains data. Kurikulum yang ditawarkan di sepanjang latihan adalah bersifat *industry-leading curriculums* dan pelajar akan diberikan sijil profesional daripada pihak *Microsoft* yang diiktiraf oleh pihak industri.

Bagi menyokong aspirasi generasi *milenial* yang cenderung untuk bekerja sendiri, inisiatif *Gig Economy* diperkenalkan untuk membolehkan graduan bekerja sendiri berdasarkan kemahiran dan kepakaran yang dipelajari di IPT disamping memperkasakan Kerangka Penjana Pekerjaan (*Job Creator Framework*) yang membuka ruang kepada kerjaya sebagai usahawan.

Kerjasama strategik dengan industri dan agensi pembangunan keusahawanan seperti Agensi Kaunseling & Pengurusan Kredit (AKPK), SME Corporation Malaysia (SME Corp. Malaysia), Malaysian Technology Development Corporation (MTDC) dan CELCOM turut diperkukuhkan dalam memastikan pelajar yang mempunyai kecenderungan keusahawanan mendapat bimbingan sewajarnya untuk memula, membangunkan dan melengkapkan perniagaan mereka khususnya dalam bidang-bidang terkini selaras dengan keperluan industri 4.0 seperti *eCommerce, FinTech, logistik, big data, robotic engineering dan Internet of Things*.

Sistem Kajian Pengesanan Graduan (SKPG) yang dijalankan oleh KPM merupakan satu kajian tahunan dengan tujuan untuk mendapatkan kadar kebolehpasaran graduan selepas tamat pengajian. Menurut kajian tersebut, kadar kebolehpasaran graduan tahun 2018 selepas setahun tamat pengajian adalah 82.2 peratus secara purata bagi semua IPT dan institusi pendidikan tinggi swasta (IPTS) adalah 77.2 peratus. Kadar kebolehpasaran graduan politeknik dan kolej komuniti pula masing-masing adalah 96.1 peratus dan 96.6 peratus.

KPM sentiasa menumpukan usaha untuk mereka bentuk kurikulum pendidikan tinggi yang bersesuaian dengan keperluan semasa. Ini bagi melahirkan pelajar dan graduan yang boleh mampu menghadapi cabaran masa depan serta memenuhi keperluan negara dan industri.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

DARIPADA : YB TUAN WONG CHEN (SUBANG)

TARIKH : 18 NOVEMBER 2019

SOALAN

TUAN WONG CHEN [SUBANG] minta **MENTERI DALAM NEGERI** menyatakan rasional di sebalik pengusiran guru Turki Arif Komis dan keluarganya yang telah secara rasmi didaftarkan bawah Pesuruhjaya Tinggi Pertubuhan Bangsa-Bangsa Bersatu untuk Pelarian.

JAWAPAN

Tuan Yang Di Pertua,

Untuk makluman Yang Berhormat, pengusiran Arif Komis dilakukan setelah siasatan secara terperinci dilakukan oleh pihak Polis Diraja Malaysia. Siasatan menunjukkan bahawa beliau merupakan anggota kanan gerakan *Fetullah Gullen Terrorist Organization* (FETO) yang telah disenaraikan oleh Kerajaan Turki sebagai organisasi pengganas kerana terlibat dalam aktiviti militan untuk menggulingkan kerajaan sedia ada. Malahan, Pertubuhan Kerjasama Islam (OIC) turut menyenaraikan FETO sebagai pengganas.

Sekiranya tidak dibendung, FETO berpotensi memberi ancaman serius kepada keselamatan negara. Pengalaman dan modus operasi seperti insiden cubaan rampasan kuasa yang berlaku di Turki dikhuatiri akan mempengaruhi rakyat di negara ini. Perkara ini adalah selari dengan dasar kerajaan Malaysia untuk tidak membenarkan Malaysia menjadi tempat oleh mana-mana pihak sebagai pangkalan untuk melancarkan serangan terhadap negara - negara lain.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

DARIPADA : YB TUAN CHAN FOONG HIN (KOTA KINABALU)

TARIKH : 18 NOVEMBER 2019

SOALAN

TUAN CHAN FOONG HIN [KOTA KINABALU] minta **MENTERI DALAM NEGERI** menyatakan apakah kelebihan PAS Sementara Sabah (PSS) berbanding dengan dokumen-dokumen sedia ada seperti Kad Burung-Burung, Sijil Banci dan IMM13. Apakah usaha Kerajaan bagi mengatasi kerisauan rakyat Sabah kononnya PSS akan memudahkan pendatang tanpa izin (PTI) untuk akhirnya memperoleh kewarganegaraan Malaysia.

JAWAPAN

Tuan Yang Di Pertua,

Pelaksanaan Pas Sementara Sabah (PSS) adalah bertujuan untuk menyeragamkan kepelbagaian dokumen yang dimiliki oleh warga asing atau *displaced person* di Sabah iaitu pemegang dokumen IMM13 yang dikeluarkan oleh Jabatan Imigresen Malaysia, Kad Burung-Burung yang dikeluarkan oleh Jabatan Ketua Menteri Sabah dan Sijil Banci yang dikeluarkan oleh Pasukan Petugas Khas Persekutuan Sabah, Majlis Keselamatan Negara Sabah. Keseragaman dokumen ini dilakukan bagi memudahkan pengecaman dan operasi oleh pihak penguatkuasa.

PSS hanya akan dikeluarkan kepada pemegang dokumen sedia ada yang telah disahkan oleh agensi pengeluar yang berkaitan. Selain itu, semakan silang data antara agensi juga dilaksanakan bagi memastikan

pemegangnya adalah tulen sebelum PSS dikeluarkan.

Untuk makluman Ahli Yang Berhormat, dokumen pengenalan diri seperti Kad Burung-Burung dan Sijil Banci tidak diiktiraf oleh agensi penguatkuasa kerana dokumen tersebut bukan merupakan dokumen imigresen bagi tujuan keberadaan di Malaysia selaras dengan Peraturan 8, Peraturan-Peraturan Imigresen 1963. Sehubungan itu, PSS merupakan suatu dokumen imigresen yang membenarkan pemegangnya untuk tinggal secara sementara di Malaysia secara sah. PSS juga adalah sebagai mekanisme kawalan keberadaan dan pergerakan warga asing di Sabah. PSS akan dikeluarkan dalam bentuk kad yang mempunyai ciri-ciri keselamatan seperti biometrik dan mempunyai nombor ID yang unik yang membezakan PSS dengan pas-pas imigresen sedia ada.

Pemegang PSS masih dikategorikan sebagai warga asing dan pemegang pas ini tidak layak dipertimbangkan pemberian Permit Masuk, taraf Pemastautin Tetap dan kewarganegaraan. PSS akan terbatal sekiranya pemegangnya disabitkan dengan kesalahan jenayah atau telah mendapat passport daripada negara asal. Tindakan pengusiran akan dilaksanakan oleh JIM bagi warga asing yang telah mendapat passport daripada negara asal mengikut prosedur sedia ada. Sebelum sebarang dokumen perjalanan daripada negara asal diperolehi, warga asing ini perlu memegang PSS bagi tujuan rekod keberadaan dan pergerakan.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN NOOR AMIN BIN AHMAD [KANGAR]

TARIKH : 18 NOVEMBER 2019 (ISNIN)

SOALAN NO. 28

Minta **MENTERI PENDIDIKAN** menyatakan apakah hasil siasatan dan kajian lebih terperinci mengenai kes-kes murid yang mengambil tindakan bunuh diri. Adakah ia berkaitan dengan persekitaran persekolahan seperti peperiksaan, buli atau tekanan lain. Apakah langkah bagi memastikan kejadian sebegini tidak berulang.

JAWAPAN

Tuan Yang di-Pertua,

Kementerian Pendidikan Malaysia (KPM) memandang berat terhadap isu kesihatan mental dan masalah kemurungan dalam kalangan murid sehingga menyebabkan berlakunya kes yang tidak diingini termasuk membunuh diri. Bagi setiap kes yang berlaku, KPM akan melaksanakan siasatan terperinci secara dalaman di samping menunggu laporan siasatan pihak polis. Antara faktor yang dikenal pasti menyebabkan berlakunya kes bunuh diri ialah kelemahan mental dan emosi akibat tekanan peperiksaan dan kerja sekolah serta pengaruh persekitaran termasuk media tonton.

KPM komited untuk mencegah kejadian bunuh diri dalam kalangan murid dan berusaha menjadikan sekolah sebagai tempat murid berasa gembira untuk menuntut ilmu, penuh dengan konsep kasih sayang dan saling menghormati. KPM secara berterusan menekankan Pelaksanaan

Amalan Guru Penyayang yang bertujuan memandu setiap guru membudayakan amalan sikap kasih sayang di sekolah. Amalan tersebut diterjemahkan dalam bentuk tindakan guru yang penyayang menerusi aktiviti di sekolah. Guru yang bertanggungjawab mestilah sentiasa memberikan nasihat kepada murid terutama murid yang menghadapi masalah, termasuk masalah emosi dan mental. Selain daripada itu, kurikulum di sekolah dapat memupuk perasaan penyayang dalam kalangan warga sekolah. Kurikulum sekolah turut menekankan nilai masyarakat melalui mata pelajaran Pengetahuan Moral, Pendidikan Islam dan pelaksanaan Manual Kesedaran Sivik Dan Amalan Nilai Murni di semua sekolah.

Selain itu, KPM juga sentiasa berusaha melaksanakan pelbagai program bagi meningkatkan kesejahteraan mental dan emosi murid. Perkhidmatan Bimbingan dan Kaunseling turut memberi fokus kepada Psikososial dan Kesejahteraan Mental dalam Pembangunan Sahsiah Diri Murid. Antara program yang dilaksanakan ialah Program Minda Sihat yang bertujuan mengenal pasti tahap stress murid dan meningkatkan daya tindak murid bagi menghadapi stress. Guru-guru Bimbingan dan Kaunseling juga mempunyai pelbagai kemahiran kaunseling dan kemahiran daya tindak menangani stress seperti Teknik relaksasi, Tangani stress, Kawal marah, Berfikiran positif dan Komunikasi berkesan

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : DATO' SRI DR. SANTHARA [SEGAMAT]

TARIKH : 18 NOVEMBER 2019 (ISNIN)

SOALAN NO. 29

Minta **MENTERI PENDIDIKAN** menyatakan berapa jumlah pelajar dan peratusan yang mendapat CGPA 4.00 dari aliran STPM, matrikulasi dan politeknik yang tidak diberikan sebarang penempatan di universiti awam mengikut kaum/keturunan.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia (KPM) mengamalkan prinsip meritokrasi yang mengguna pakai 90% markah akademik dan 10% markah kokurikulum di dalam pemilihan kemasukan pelajar ke institusi pendidikan tinggi awam (IPTA) dan institut latihan kemahiran awam (ILKA). Berdasarkan prinsip meritokrasi, semua calon yang layak dengan markah merit tertinggi tanpa mengira kaum, agama, negeri, taraf hidup dan tempat tinggal diberi peluang untuk mengikuti pengajian di IPTA dan ILKA. Calon-calun yang layak dan memenuhi Syarat Am, Syarat Khas Program Pengajian serta kriteria pemilihan yang telah ditetapkan akan dipertimbangkan berdasarkan kepada pilihan program pengajian yang dipohon oleh calon.

Saban tahun KPM telah menerima peningkatan bilangan permohonan kemasukan ke peringkat Ijazah Pertama daripada calon cemerlang dengan keputusan PNGK 4.0 di peringkat Sijil Tinggi Persekolahan Malaysia (STPM), matrikulasi dan diploma. Bagi Sesi Akademik 2019/2020, seramai 2,168 calon lepasan STPM, matrikulasi dan politeknik yang mendapat PNGK 4.0 telah memohon UPU *Online* untuk melanjutkan pengajian ke universiti awam. Semua calon yang memohon dan layak telah ditawarkan tempat pengajian berdasarkan program yang dipilih oleh calon dengan pecahan 738 orang kaum bumiputera dan 1,430 orang bukan bumiputera.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN SIVAKUMAR VARATHARAJU NAIDU
[BATU GAJAH]**

TARIKH : 18 NOVEMBER 2019 (ISNIN)

SOALAN NO. 30

Minta **MENTERI PENDIDIKAN** menyatakan pembaharuan-pembaharuan yang dirancang untuk penjadian dan pembangunan modal insan murid-murid di peringkat sekolah menengah. Sejauh manakah program-program TVET yang dilaksanakan di bawah Kementerian Pendidikan telah berjaya melahirkan tenaga kerja berkemahiran tinggi memenuhi pasaran buruh tempatan.

JAWAPAN

Tuan Yang di-Pertua,

Kementerian Pendidikan Malaysia (KPM) telah melaksanakan Transformasi Pendidikan Vokasional (TPV) mulai tahun 2012 bagi mengangkat martabat pendidikan vokasional sebagai aliran perdana. Matlamat TPV adalah untuk melahirkan pelajar yang berkemahiran bagi memenuhi keperluan industri di dalam negara serta memfokus kepada kemenjadian dan pembangunan modal insan murid di peringkat sekolah menengah. Bagi tujuan tersebut, Kerajaan sentiasa menambah baik ekosistem pendidikan dan latihan teknikal dan vokasional (TVET) bagi memastikan pelajar dan graduan yang dihasilkan adalah menepati keperluan pasaran terutamanya dalam era Industri 4.0.

Berikutan itu, Kementerian Pendidikan Malaysia (KPM) telah dan sedang melaksanakan pelbagai pembaharuan bagi melahirkan tenaga kerja berkemahiran tinggi di seluruh negara. Antaranya adalah:

1. Pembangunan kurikulum TVET mesti melibatkan pandangan dan kepakaran industri untuk mendapat input yang berkaitan dengan standard dan piawaian yang diperlukan oleh industri;
2. Hubungan kolaborasi dan kerjasama strategik dengan industri telah dipertingkatkan melalui pelaksanaan MoU dengan industri; dan
3. Institusi TVET telah melantik panel penasihat di kalangan industri untuk sentiasa memberi pandangan bagi menjamin kualiti program TVET yang dilaksanakan.

Kerajaan juga terus komited dalam memperkasakan TVET dan ini dibuktikan apabila Mesyuarat Jemaah Menteri pada 14 Ogos 2019 telah bersetuju dengan penubuhan Jawatankuasa Kabinet Pemerkasaan TVET (JKKPTVET) yang akan merentasi sembilan (9) kementerian termasuk Kementerian Sumber Manusia. Tujuan jawatankuasa ini adalah sebagai badan penasihat kepada Kerajaan untuk pembangunan aliran TVET negara selain turut membahaskan isu-isu semasa negara berkaitan TVET. Jawatankuasa Teknikal TVET pula dipengerusikan dan dianggotai oleh pemain-pemain industri, pegawai kanan semua kementerian dan agensi yang telah dibahagikan kepada lima kluster ialah kluster governan, industri, kualiti, pembiayaan dan penjenamaan.

Selain daripada itu, KPM juga meneruskan usaha mengarusperdanakan TVET melalui Sistem Jaminan Kualiti Tunggal TVET yang bertujuan untuk memperkukuhkan sistem akreditasi program TVET secara menyeluruh. Selaras dengan ini, satu Jawatankuasa Teknikal Bersama Jaminan Kualiti Tunggal TVET telah ditubuhkan dengan dianggotai wakil daripada Agensi Kelayakan Malaysia (MQA), Jabatan Pembangunan Kemahiran (JPK), pelbagai Kementerian dan industri untuk menyelaraskan dasar dan proses jaminan kualiti program TVET. Bagi memastikan pelaksanaan Sistem Jaminan Kualiti Tunggal TVET yang berkesan, MQA bersama JPK di bawah KSM telah membangunkan dokumen Kod Amalan Akreditasi Program TVET (Code of Practice for TVET Programme Accreditation) sebagai rujukan utama dalam pelaksanaan jaminan kualiti program-program TVET di Malaysia.

Seiring dengan perkembangan Industri 4.0 pula, KPM juga telah menerbitkan Rangka Kerja TVET 4.0 (2018-2025) sebagai garis panduan kepada institusi TVET di bawah kementerian termasuk politeknik, kolej komuniti, kolej vokasional serta *Malaysian Technical University Network* (MTUN) yang terdiri daripada Universiti Malaysia Pahang (UMP), Universiti Tun Hussein Onn Malaysia (UTHM), Universiti Teknikal Malaysia Melaka (UTeM) dan Universiti Malaysia Perlis (UniMAP).

KPM juga sentiasa bekerjasama dengan industri dalam memastikan kurikulum yang digunakan menepati keperluan industri melalui kerjasama antara Politeknik Mersing, Johor dan *Cybersecurity Malaysia* dalam membangunkan Diploma Dwi-Akreditasi Dalam Teknologi Maklumat dan Pensijilan Profesional Keselamatan Siber Global. Kerjasama Politeknik bersama *Malaysia Digital Economy Corporation (MDEC)* juga telah memanfaatkan lebih daripada 10,000 pelajar politeknik dalam program Diploma Teknologi Maklumat (Teknologi Digital) bagi memenuhi keperluan industri digital.

Inisiatif-inisiatif ini turut menyumbang kepada peratusan kadar kebolehpasaran graduan Politeknik dan Kolej Komuniti pada tahun 2018 iaitu sebanyak 96.1% (Politeknik) bagi dan 96.5% (Kolej Komuniti). Manakala bagi program Diploma Vokasional Malaysia (DVM) yang dilaksanakan di kolej vokasional (KV), KPM telah berjaya melahirkan graduan pertamanya bermula tahun 2016. Sehingga kini, lepasan KV mendapat sambutan yang baik oleh industri di mana graduan tahun 2016 (100%) kebolehpasaran, tahun 2017 (96.7%) dan 2018 (87.05%).

Sekian, terima kasih.

**PEMBERITAHUAN PERTANYAAN BAGI JAWAB LISAN
DEWAN RAKYAT**

PERTANYAAN : JAWAB LISAN

DARIPADA : TUAN CHA KEE CHIN [RASAH]

TARIKH : 18 NOVEMBER 2019

SOALAN

TUAN CHA KEE CHIN [RASAH] minta **MENTERI DALAM NEGERI** menyatakan kenapa dua orang wakil rakyat dan beberapa orang lain ditahan di bawah Akta Kesalahan Keselamatan (Langkah-Langkah Khas) 2012 baru-baru ini dan memperlakukan mereka seolah-olah mereka adalah pengganas walaupun rekod peribadi mereka menunjukkan sebaliknya, dan bilakah SOSMA ini mahu dimansuhkan.

JAWAPAN

Tuan Yang Di Pertua,

12 orang individu termasuklah dua orang wakil rakyat berkenaan telah ditahan oleh pihak polis kerana mereka didapati terlibat dalam mempromosi, menyokong dan mengumpul dana untuk kumpulan pengganas Liberation Tigers of Tamil Eelam (LTTE). Penahanan mereka bukanlah dibuat secara rambang atau secara membuta tuli. Sebaliknya penahanan mereka dibuat setelah pihak polis mempunyai keterangan dan bukti yang menunjukkan penglibatan mereka dengan LTTE. Contohnya, mereka didapati cuba untuk mengaktifkan kembali kegiatan LTTE dengan menganjurkan program-

program mempromosikan LTTE dan aktiviti pungutan dana bagi kumpulan pengganas tersebut.

Selain itu, mereka turut terlibat dalam menganjurkan sambutan yang mengagung-agungkan kumpulan pengganas berkenaan seperti sambutan “Blacktigers Day” iaitu sambutan bagi meraikan pejuang-pejuang berani mati LTTE, “Prabakaran’s Birthday” (sambutan hari kelahiran pemimpin LTTE) dan “Martyrs Day” (sambutan bagi memperingati pejuang-pejuang LTTE di Sri Lanka yang mati semasa pertempuran pada tahun 2009).

Kesalahan mereka iaitu kesalahan di bawah Bab VIA Kanun Keseksaan diklasifikasikan sebagai kesalahan keselamatan di dalam Jadual 1 Akta Kesalahan Keselamatan (Langkah-Langkah Khas) 2012 (SOSMA). Oleh kerana itu, penahanan mereka telah dibuat mengikut prosedur Akta Kesalahan Keselamatan (Langkah-Langkah Khas) 2012 (SOSMA) untuk siasatan.

Saya ingin menegaskan bahawa tindakan polis berkaitan penahanan 12 individu terbabit adalah dibuat mengikut lunas undang-undang dan tidak dipengaruhi oleh mana-mana pihak. Kementerian sedang mengkaji semula undang-undang berkaitan keselamatan negara termasuklah SOSMA. Berdasarkan input-input yang di terima dari pelbagai pihak hasil daripada sesi libat urus yang telah dilaksanakan Kementerian akan memuktamadkan cadangan pindaan setelah kajian menyeluruh selesai dilaksanakan.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

DARIPADA : YB ARTHUR JOSEPH KURUP (PENSIANGAN)

TARIKH : 18 NOVEMBER 2019

SOALAN :

Tuan Arthur Joseph Kurup [Pensiangan] minta **MENTERI DALAM NEGERI** menyatakan apakah langkah untuk memudahkan proses permohonan visa oleh pelancong daripada negara asing ke Malaysia.

JAWAPAN

Tuan Yang Di Pertua,

Untuk makluman Ahli Yang Berhormat, Jabatan Imigresen Malaysia hanya mengeluarkan visa dalam bentuk pelekat dikenali sebagai Visa Malaysia sebelum tahun 2016. Sebagai usaha penambahbaikan kepada kemudahan visa sedia ada, Kerajaan telah memperkenalkan kemudahan visa atas talian iaitu eVISA dan memperkenalkan semula kemudahan Visa Semasa Ketibaan (*Visa on Arrival* - VOA). Selain itu, Kerajaan komited dalam menambahbaik kemudahan imigresen dengan turut memperkenalkan Program Pengecualian Visa melalui kemudahan eNTRI dan melaksanakan semula kemudahan 120 jam Transit Tanpa Visa.

Pada Mac 2016, kemudahan eVISA yang merupakan kemudahan visa secara atas talian mula diperkenalkan kepada pelancong daripada 10 buah negara secara berperingkat bermula dengan warganegara China, India, Bangladesh, Pakistan, Nepal, Sri Lanka, Myanmar dan diperluaskan kepada negara-negara Balkan termasuk Bhutan, Serbia dan Montenegro.

SOALAN NO : 32

Melalui kemudahan ini, pemohon daripada 10 negara tersebut boleh membuat permohonan eVISA dari mana-mana lokasi di seluruh dunia kecuali di Malaysia. Kelulusan eVISA boleh diperolehi dalam tempoh 48 jam waktu bekerja dan pemohon hanya perlu mencetak Nota eVISA yang dihantar oleh sistem tersebut terus ke emel pemohon. Setelah menerima kelulusan eVISA dalam bentuk Nota eVISA, pemohon diberi masa selama 3 bulan untuk membuat perjalanan ke Malaysia. Tempoh keberadaan pelancong yang masuk ke Malaysia menggunakan kemudahan eVISA ialah 30 hari bagi setiap kemasukan. Kemudahan eVISA ditawarkan dengan Sekali Perjalanan (SEV) untuk semua warganegara manakala khusus untuk warganegara India juga ditawarkan dengan Berulang Kali Perjalanan (MEV).

Tuan Yang Di Pertua,

Kerajaan Malaysia telah memberikan kemudahan VOA kepada warganegara asing sejak tahun 2002 di pintu masuk negara untuk tujuan sosial seperti melancong, menghadiri seminar, mesyuarat dan lain-lain.

Kemudahan VOA telah dimansuhkan pada 16 Ogos 2010. Seterusnya, Mesyuarat Jemaah Menteri pada 18 Disember 2013 dan Mesyuarat Kabinet Pelancongan ke-10 Bil. 1 Tahun 2013 telah memutuskan untuk memberikan kemudahan VOA kepada warganegara Republik Rakyat China (RRC) dan India sahaja dengan terma dan syarat yang ditetapkan.

Pada April 2017, Kerajaan juga telah memperkenalkan Program Pengecualian Visa kepada pelancong warganegara China serta pelancong dan ekspatriat warganegara India melalui kemudahan eNTRI (*Electronic Travel Registration and Information*). Pendaftaran eNTRI dilakukan secara atas talian dan tiada kelulusan diperlukan. Jika pendaftaran berjaya dilakukan, Nota eNTRI akan dihantar melalui emel dan mereka boleh membuat perjalanan ke Malaysia dalam tempoh 3 bulan. Pelancong yang masuk menggunakan kemudahan eNTRI boleh masuk ke Malaysia melalui 15 pintu masuk seluruh negara melibatkan 9 pintu masuk udara dan 6 pintu masuk darat. Tempoh keberadaan di Malaysia ialah 15 hari bagi setiap kali kemasukan. Kemudahan eNTRI merupakan kemudahan secara bertempoh dan terkini telah dilanjutkan sehingga 31 Disember 2019.

Tuan Yang Di Pertua,

Untuk makluman Ahli Yang Berhormat, Kerajaan juga menyediakan Kemudahan Transit Tanpa Visa 120 jam bersamaan 5 hari kepada pelancong warganegara *Indian Sub-Continental* yang terdiri daripada Bangladesh, India, Pakistan dan Sri Lanka tertakluk kepada syarat-syarat tertentu. Kemudahan ini telah diperkenalkan semula mulai 15 Julai 2010 setelah dihentikan pada tahun 2009. Pelancong yang ingin mendapatkan kemudahan ini dibenarkan masuk atau keluar ke Malaysia atau dari Malaysia melalui Lapangan Terbang Antarabangsa KLIA termasuk KLIA2.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KE EMPAT BELAS**

PERTANYAAN : LISAN

**DARIPADA : DATUK DR. JEFFREY GAPARI KITINGAN
[KENINGAU]**

TARIKH : 18 NOVEMBER 2019 (ISNIN)

SOALAN

Minta **MENTERI PERTANIAN DAN INDUSTRI ASAS TANI** menyatakan mengapa dalam Program Pemberian RM20,000 geran untuk tanah terbiar yang dilancarkan baru-baru ini oleh Jabatan Pertanian Persekutuan telah mengecualikan Sabah daripada program tersebut dan adakah Jabatan Pertanian tidak menganggap Sabah adalah sebahagian integral dalam Malaysia.

JAWAPAN

Yang di-Pertua,

1. Kementerian sentiasa membuka peluang kepada setiap negeri untuk menikmati kemudahan insentif yang ditawarkan oleh kerajaan persekutuan dan peruntukan yang disalurkan ke setiap negeri adalah berdasarkan permohonan yang dikemukakan oleh Jabatan-Jabatan Pertanian Negeri. Justeru, adalah tidak benar Kementerian mengecualikan Negeri Sabah dalam pelaksanaan Projek Tanah Terbiar.

2. Sehingga kini, seluas 10,199.19 hektar tanah terbiar telah dibangunkan di seluruh Semenanjung Malaysia, Sabah, Sarawak dan Labuan. Seramai 8,082 orang pengusaha telah menerima insentif dengan jumlah peruntukan berjumlah RM109.64 juta. Daripada jumlah tersebut, Negeri Sabah telah menerima jumlah peruntukan sebanyak RM10.749 juta bagi 1,283 orang pengusaha yang disalurkan melalui Jabatan Pertanian Negeri Sabah.

3. Dalam usaha mengoptimumkan penggunaan tanah untuk tujuan pertanian, Kementerian Pertanian dan Industri Asas Tani telah melaksanakan Projek Pembangunan Tanah Terbiar dengan insentif kepada usahawan dan pemilik tanah pada kadar maksimum RM20,000 per hektar secara *one-off*. Projek Pembangunan Tanah Terbiar ini bertujuan untuk membangunkan tanah agar produktif dan memberi pulangan kepada pengusaha di samping peningkatan dalam pengeluaran tanaman makanan negara dengan skop seperti berikut :

- i. pembangunan infrastruktur asas seperti pembersihan kawasan, sistem pengairan dan saliran serta pembinaan jalan ladang; dan
- ii. input pertanian berupa benih, baja, racun, mesin dan peralatan kecil.

Sekian, terima kasih.